


Soothuneya Thanu na mosa Sa Kapiriyeli Omuthotola Daniyeli

 Masi oothamala saana ni a...aximiravo ahu voosiis'ula, axikhaani, munnaasuwela, axikhaani “fifi” ni “faifai,” axikhaani, e, moosuwela, a muloko ni thanu na mosa. Nto awo anvolowa mukereja, moosuwela, mwa...Axiruusi axikhaani, a munnuwelo yoowo, awo anthuna ekhalaseke ooreera, moosuwela. Awo, moosuwela, maihi onyokotowa, vamuru vaya; Miyo kaahaaweha, okathi waalaley'aka, yaakhala evololaka, evololaka. Nto, nuvira okathi vakhani, yaaniiseela wiitho waya, onyokotowa wothene woowookowa.

² Mwaaruusi mukhaani a Munna muthiyana Downing, ni—ni miyo naahimona. Ni mwaana—mwaana—mwaana...Mwaana a Munna Collins...Nsina nawe ti pani? Mwanamwane... [Munna mmosa oniira, “Betty.”—Mol.] Betty, mwanamwane Betty. Mwa enamuna emosa kaahithey vakhani, mmansaka. Masi kaahona oreera wothene, moosuwela, sothene sookhalihwa saana, vano nto naanaanoru yaari...

³ Ahe, mureerihwe, oophentiwa, nyuwo mwa ooreerasa, wa miyo, khula enamuna. Ti yeeyo. *Oreera*, ti, ti eroho yooreera enrowa orwa n'ukilaathi mmuthukumanoni siiso, ni wiiwa Ehapari yooreera. Ti yeeyo enimukhalihwa mwali oreera. Ni kinoona wira mmiravo eekeekhai, omphwanelela othela, onuupuwela etthu yeeyo. [Munna Neville oniira, “Amen.”—Mol.] Kooxukhuru, mulopwana. Ti yooreera. Ookhala okeemerenrye. Wira, eyo ekeekhai. Vaareera. Kinnaamini wira eyo Ekeekhaii.

⁴ Vano eyo kahi yootikiniha? Kilukamme omukhunla Daniyeli 9 okathi omukhunlaly'aka Bibilia aka. Vano, voolimaleleya kinnaaleela atthu othene, wira ehirule ikhasako, arina mwiithe vakamisani vaya, kinroromela wira yawaka kherina. Masi—masi kihoona okathi kahaakhanly'aka orulaka, ni mwiithe vakamisani, vekeekhai. Ni kinoona wira ela kherina.

⁵ Vano, oh, wa yoomi, hiyo...ni kookupali wira wa muthukumano, ninnixukhuru mwaha wa Mukhalelo wa Eroho Yowarya voosiis'ula.

Ni ninnixukhuru mwaha wa opatthana ni okhala wa khula mmosa. “Ti yoosivela, yooreera, yootthuneya, axinna okhala vamosa yiiraanaka. Onkhala ntoko makhura oowunkhela ooreerexa ankhuruwela ireru s'Aroni, ekhuruwelaka soowara sawe.”

⁶ Kaahirowa iwe olya olelo, oBlue Boar, nto t'ani kaamuphwanny'aka iwe woohikhala Munna Bill va, ni Munna

muthiyana Dauch ekilaatheene iwe, paahi—emukhuuraka mwalyakhu mmosa owooxiwa mmakhurani vooreerexa, kitonko aka omoona, ni evirihaka okathi wooreera, yiilipihaka wa yeeyo, moosuwela. Miyo khuwela epantte y'osulu khukumana nnikhuru nuulupale na ekereja osulu iwe, vano awo yaatthuna okilivela yolya aka. Vano, eyo yaari yooreera saana, kinnixukhurela yeeyo.

⁷ Varowaly'aka owaani, va aarwa Billy ni ekaaxa emosa ya ixuwaari mutthu mmosa aakirruhenly'awe, okhuma elapo ele, yooreera ni yooriirya ya oGeorgia iwe, weiwo okhanle wooriirya-wo saana, kinileeliwaaka, okathi yoola ola.

⁸ Numala, kikumana ni mwamulopwana mmosa vate. Kaakhuma kaavaanel'aka-wo, exekuw'ela, ni kaarwa okereja ewoora yoophiyaka emosa ni nuusu evinre, ni mwaamukhaani. . .ntoko mwammiravo mmosa, vate, owo khwira. . .miyo khwira, "Vaaviha."

Owo khwira, "*Vekeekhai* vaaviha!" Kaahisuwela wira owo aari a oGeorgia, vano owo khwira, "*Vekeekhai* onniviha oGeorgia!"

⁹ Ahe, hiyo nimphavela otthyawa nipuro nle noovihaxa, kahi siiso? Ti yeeyo ekhalenly'ahu va.

¹⁰ Kooxukhuru vanci-ene, apatthani, mwaha w'oreera wanyu murima wothene. Kaarowa wira exeeni muhikhanle nyuwo? Etthu paahi—kaarowa wira exeeni muhikhanle nyuwo? Kahaakhalanne mutthu ookiphenta, mutthu aarowa wiiwa Mutthaka, Mutthaka aka wothene khawaarowa okhala etthu nnakhala. Nkikhanle olaleeryaka Eyo mapotto a telefoni ni miri. Iyo khasaarowa wiiwa. Tivo ahaana okhala atthu ntoko nyuwo othene, anrowa orwa wiiwa yoowo. Nto mwaarwaaka khukilaathi nipuro nooviha ntoko nla, ni ti. . .Amwaar'aka ahimnye wira yoonna ntoko opaheya ottuli iwe, voosis'ula. Nto owoonaka atthu, ni imaara sikina aretta, anikilaathi mmithukumanoni mmo siiso, Muluku oovaheni e—ethoko, yooreera yoophenteya Moovuwani, ti mavekelo aka. Ni kinwehererya ni kinroromela wira Owo onimwiira yeeyo.

¹¹ Vano, nrowe noone. Ekhasako aka, ookhala mutthu okunxe va. Nto kihaana osoma vakhani ohiy'ula. Akavi sinaasivela ipantte soopacerya sa yoola? [Muthukumano oniira, "Amen."—Mol.] Oh, wahaaviha vanci-ene, naamukhala nikelalaka ohoolo paahi, esumana yothene, ni e—Eliivuru ya Wiisuupulula. Miyo okisivela paahi Yeeyo. Kinkhala mwa Yeeyo paahi. Nto nyuwo, mwa enamuna emosa, mukivekelele, esuman'ela, okhala wira Ettiminku enrwa miyo. . .Apwiya yatthuna vale, kihaana okumanana eyo, okhaliha isumana iyo vamosa. Nto eyo etthu emosa kihinsuwel'aka hat'etthu. Vano siiso kinrowa waaroromela Apwiya wira Awo anookivaha eyaakhulelo.

12 Ni ko—koosoma s'axilopwana anci-ene oohiyana-hiyana yaawo—yaawo alavunle yeeyo, yaawo alempe sa yeeyo. Koosoma soolepa sa vathi va, sa Dr. Scofield, musomi muulupale, masi vekeekhai nkiwenrye wiiraana ni yoowo, mwa soolepa sawe sinci-ene sa vathi, 'okhala wira nkinwerya wona. Vaavo . . . Eyo ehaana o—eyo ehaana okhaliha elatarato oratteene.

13 Vano, vaakhanle wira mwaamulokiha musewe ole oopwexa muru vamosa, nto naanaanoru, nyuwo munaira, "Oh, ela enrowa vasulu *va*. Nnari, kookupali wira ela enrowa vasulu *va*." Ahe, muhaana oweha v'ethoonyeryoni vanyu, wira moone eniir'anyu. Vano nto nyuwo mwa—nyuwo mwaahiwehe, munoomutapanya musewe anyu othene.

14 Vano ankhi mwaakunxe . . . mwaakhalanne elatarato ya ekuluttu, yuulupale yooreera, ni enyompe ely'aka malaxi vasulu va mwiri? Vano, eyo khayaarowa okhala yoolikana (yaamukhala?), 'okhala wira eyo khenlya malaxi vasulu va mwiri. Tivo, ti siiso ery'aya, nyuwo, Eroho Yowarya yaahikhaliheke Soolempwa iyo vamosa. Vano, munookhalana elatarato, yothene yuulupale ya ovuluxa. Ti yeeyo hiyo entthun'ahu, Ekeekhai. Ni mpakha nisuwele Ekeekhai, ninrowa ohiya siiso. Vano nto, Muluku aanivahaka Ekeekhai, ahe, vano kinoolavula yeeyo.

15 Nyuwo moosuwela? Kinoona wira Munna Roy Slaughter ni—ni amosa-amosa w'ale a khalayi va, apacenrye khalayi . . . Yaahikhala ntoko, kinoona wira, iyaakha tthaaru wala xexe soopacerya sa muteko aka, vaava va otapernakulu, miyo nkaalaleerya mwaha wa omooroni, okhala wira nka—nkaawerya osuwela saana sinto naari nipuro naavarela, sinto waari omahiye. Nto khula okathi Masu yaahimy'aya, *mahiye*, miyo kaakuxa otaphuleliwa, wira, "*Hades*." *Hades* ti "mahiye." Khula okathi Awo yaahimy'aya sa omooroni, "*Hades*, mahiye." Nto miyo kaanihiya eyo meekh'aya mpakha miyo osuwela vekeekhai etthu yaahimy'aya, vano miyo khulaleerya mwaha wa omooroni, vano p'ukathi osuwenly'aka vekeekhai, elatarato yothene, khoona nipuro vaary'aya-vo. Okhala wira, kinnoona wira murumeyi ti namwaakhula wa Muluku, etthu onihimeery'awe muthukumano, okhala wira awo anrowa ovarelela yeeyo. Vano siiso, nto, ankhi miyo kaavareleliha awo nipuro noohiloka, vano nto khuphiya okathi eyo ehinlip'aya? Munnona?

Nto mwa yoowoona Apwiya yaakivahaly'aya, okathi vakhani ovinre, okathi imilyawu iye . . . okathi Ole aalavula ni miyo, iiraly'awe, "Nyuwo munrowa olamuliwa, toko, mwaha w'Ehapari enlaleyaanyu."

16 Miyo khwira, "Miyo kinlaleya etthu emosaru Paulo olaleiy'awe, n'ale akina."

17 Nto masu ale othene imilyawu sene khukhuwela, "Hiyo nimmumula mwa yeeyo." Yaari yeeyo. Munnona? Ekeekhai.

¹⁸ Vano kintthuna kitthikele ohiy'ula, vano, wira nihipise vanci-ene. Ni muhiliyale vano...Vano, voosiis'ula... Kookhalana soolepa kamosa-kamosa va. Voosiis'ula koolavula mwaha wa Daniyeli mw'epothani, Kapiriyeli amurweelaka khumwiixuttihi sa ohoolo. Ti yeeyo naarin'ahu voosiis'ula, wiixuttihiwa sa ohoolo.

¹⁹ Vano, ohiy'ula, ninlavula mwaha wa *Soothuneya Thanu na mosa Sa Kapiriyeli Omuthotola Daniyeli*. Ettiminku enrwa, Apwiya yattthuna vale, ninookhaliha isumana miloko mithanu na miili, vatthu vaniir'aya-vo mpannta, muhina mwa etthu y'okathi. Ni hiyo nimphwanyaneya vayi? Vano, nawerya-ru paahi ophwanya yeeyo ni okhaliha oratteene, ekeekhai, nto ninoosuwela okathi onkhal'ahu. Vano, khaninrowa osuwela okathi Owo onrwaawe; khaavo onrowa osuwela eyo. Yesu khansuwela eyo, Mwaneene. Owo ohimnye wira khaasuwela. Owo ohimnye wira Atithi paahi, tu, ti yaasuwela eyo. Hata Malaikha khansuwela. Khaavo hata mmosa a hiyo onsuwela okathi Owo onrwaawe, masi ninoowerya ohimya o-okathi o...okathi hiyo onkhal'ahu, nisuwelaka paahi vakhiviru xeeni naakhanly'ahu okhalaka.

²⁰ Vano, wa otthikela vakhani, okhala wira amiravo ampaka ifiita sa yeela...Maakina anvara muteko ottuli musaala. Ni ifiita, vekeekhai, sinniroihiwa, mapuro othene.

²¹ Vano, nisomi na voosiis'ula, vamanly'ahu otthikela woona kapiitulu 4 ni 5, vano noohela e...opacerya kapiitulu 9 ya Daniyeli. Nto vano, ohiy'ula, nintthikela kapiitulu 9. Nihinatthi ophiyerya, nrowe nuurame muru ahu okathi vakhani nilavule ni Mwaneene Masu.

²² Muluku ahu ooreera murima, hiyo nookupali wira Nyuwo munnisuwela khula etthunelo ya mirima sahu. Nyuwo munnisuwela xeeni ekhalenly'ahu va. Ni Nyuwo munnisuwela wira khaniruule ohiy'ula mwaha wo wira nuupuwela paahi wira naarowa okhala nipuro nooreera orwa, orwa wiitthyuuwa vakhani exekuw'ela. Tithi, nkinkupali wira ookhala mutthu mmosa va ni niwoko nenlo. Kookupali wira hiyo niri va ohiy'ula okhala wira n'anaxariya voomalela, a nneema, ni nintthuna osuwela SIISO ANIHIMYA T'APWIYA.

²³ Hiyo ninnoophentani Nyuwo, Pwiya, ni ninniphenta Masu Anyu. Ni nipuro nla Nyuwo munivahenry'anyu hiyo, epatho paahi vamuru vahu, ni ipulooku iya sa kokotto, hiyo ninnooxukhuruni mwaha wa nipuro nla. Tthiri, hiyo ninnaamini wira yookhala Etthoko epantte ekina y'erimu, weiwo onrow'ahu. Ni ninniwuupuwela axitiith'ihu yahaakhalanne nnakhala oreeriwa nno, ni enninkhaliha oowuurama miru sahu vovuuliwa muru, Pwiya, hata wiikhupanyerya.

²⁴ Vano, Tithi, hiyo ninvekela wira Nyuwo munikhunlele, ohiy'ula, Soolempwa. Murwe, mweette vamosa, ni khula mmosa

a hiyo, okathi ontthar'ahu ephiro ela ohiy'ula. Mulavule ni hiyo ntoko mwaawiireny'anyu ale yaarowa Emawusi, okhuma oYerusalemu. Wira, muteko waphiya okhomoni, ohiy'ula, nirowe mmawannyihu moohiyana-hiyana niire, "Khinoona murim'ahu oniviha okathi waamwiiw'ahu Owo alavulaka mwa Masu Awe!"

²⁵ Mureerihe osoma. Mureerihe wiilipiha waka wootteettheya, Pwiya. Mutthukule eyano aka wa ele ekhanle ekeekhai, ni mutthuke wa ele ekhanle yoovonyeya. Ni ovuwa okhale wa Nyuwo, ni ovuwa mwa atthu Anyu, wira ewerye woona okathi onkhal'ahu ni okhuveela Orwa wa Pwiya Yesu. Vano, hiyo ninvekela mwa Nsi—Nsina Nawe, Nsina na Yesu Kristu. Amen.

²⁶ Vano, wira nitthikele Soolempwa sahu vakhani, ninniphwanya wira Daniyeli aahikhala w'epotthani iyaakha miloko mithanu na mosa ni thanu na tthaaru soolekela. Nkuupuwelani yeeyo! Vano, nyuwo, ni epaphelo anyu ni elaapi, muhilempe voosiis'ula, mulepe ohiy'ula. Okhuma 606 mpakha 538 D.C. Mukuxe 538 okhuma 606, munikhalana iyaakha miloko mithanu na mosa ni thanu na tthaaru Daniyeli aakhanly'awe. . . w'epotthani; hata ekereja wira arowe-wo, nnakhala mutthaka wira aiwe, hat'etthu. Masi owo aahikhalana iliivuru kamosa-kamosa, isapala kamosa-kamosa, profeta mmosa aalaleny'awe owo ahinatthi, ni aari—aari Yeremiya.

²⁷ Vano, asomaka Soolempwa, owo aahoona wira okathi waahipacerya omala, wira okathi wa iyaakha miloko mithanu na miili. . . Ni Daniyeli voottittiimiha-vo aanaamini khula nuulumu profeta Yeremiya aahimaly'awe. Nto miyo kinihimeerya ela, muxovo aka ohiy'ula: Nihaana owaamini maprofeta ahu? [Muthukumano oniira, "Amen."—Mol.] Ayo, mulopwana. Tthiri, Masu a Apwiya jaarweela maprofeta. Awo jaarina SIISO ANIHIMYA T'APWIYA. Ni profeta eekeekhai khonrowa nnakhala ovirikana ni mo—moolumo a profeta mukina. Awo kharowa wiirha Awo ohimya etthu Awo ahihimaly'aya. Awo vekeekhai arowa ohimya oratteene ele profeta eekeekhai ehimaly'awe, eyo ennaakhaliha profeta. Vano awo yavara eyo, vano nto annihimya khalayi ene etthu enrowa orwa, esuwelaka ela, ni woova ni murima, wira ehimye etthu yoovonyeya nto eyo enamuthweeleliha mutthu. Hiyo khinnatthuneke wira yeeyo. Hiyo ninthuna nikhaleke ookupali voomalela wira nirina Masu a Apwiya nihinatthi wira SIISO ANIHIMYA T'APWIYA. Munnona? Ohaana okhala mutthaka, voomalela onkhuma Veehiceni va Muluku, ahiiso khanaakhanle ohimyaka.

²⁸ Vano, asomaka Soolempwa, owo aahoona wira isumana miloko mithanu na miili saammala. Tivo, owo ary'ene weiwe iyaakha miloko mithanu na mosa ni iyaakha thanu na tthaaru, saahala iyaakha piili ohoolo mpakha Muluku aarowaawe waahokoloxerya atthu Awe elapo aya.

Alompaka, hiyo ninnoona wira naahikhala Nlaikha noowerya naarwiiye nikhumaka Wirimu. Ookhala onwerya ohimya nsina Naya? [Muthukumano oniira, “Kapiriyeli.”—Mol.] Kapiriyeli. Nto Nlo ti Nlaikha wa ekereja y’aYuta. Akavi ansuwela yeeyo? Mapuro othene, ti Kapiriyeli. Kapiriyeli t’okhanle namitthaka a ekereja, ekereja y’aYuta; naahimurweela Maria; Nlo naahimurweela Zakariya. Kweekwe, ti Kapiriyeli. Ni Nlo ti nimosa wa Malaikha maalupale a Wirimu. Nto Nlo khanaamuruuhenle Munn’ihu Daniyeli nikhomaso noothamaleya okhuma wa Muluku! “Oh, Daniyeli, oophentiwa vanci-ene!”

²⁹ Eyo khayaarowa owiirihani saana, wuupuwela wira Muluku onnoophentani? Kahaakhanle oophentiwa vanci-ene, vaamukisivela osuwela wira kinniphentiwa vakhani osulu Iwe, nyuwo khawoosivelani? Vekeekhai. Mwa enamuna emosa ya . . . Owo onnikuupuwela, imaara kamosa-kamosa, eyo yaamukiiriha otthuna okhuhwela, wuupuwela wira Owo onnikikhapelela. Nto hiyo nookhalana nroromelo wira Owo onnikikhapelela, okhala wira, “Nlelo niry’ene anatampi, Kristu onnikhwela,” munna. Nto, vano, hiyo naari amalapo wa Muluku, vano oonikhuveeliha wa Muluku ni oonivaha neemexeryo no woopoliwa wahu, ekhanle, Eroho Yowarya. Ni ni waamini mme onnivenxa khunikhaliha vasulu va itthu sa molumwenkuni, nto hiyo nineetta vasulu vaya. Eyo ti yoovuwa. Kehiyo? Vaareera.

³⁰ Alompaka, Kapiriyeli aahirwa khumuhimeerya wira khisaahala-tho iyaakha piili paahi awo ehinatthi orowa otthikela elapo aya, masi aahimuhimeerya ekiseryo yothene ya nloko nle. Muupuwele yeeyo! Ekiseryo yothene, khula mukwaha wa mulaponi, Kapiriyeli aahimuleela Daniyeli. Khuhimya wira Owo aarummwe wira amuhimeerye Daniyeli etthu ila yuulupale. Profet’ole oonale sayi! Ni Owo aahimuleela wira saahikhala isumana miloko mithanu na miili saakumiheriwe mwaha w’atthu, mpakha woomalelani; eyo ti emalelo y’okathi, wira sothene simale, woomalelani. Owo iirale, “Sookhala isumana miloko mithanu na miili.”

³¹ Akina anaalikela yeeyo mwa miyeeri, akina mwa mahiku, akina . . . Huh! Vakhala wira vekeekhai isumana paahi, siri iyaakha piili paahi ni epante ya neexexe ya eyaakha, wala eyaakha emosa ni epante yaneexexe. Nto, moone, nyuwo . . . Ti vaavo nirin’ahu ophwanya, wira nikhale oororomeleya.

³² “Isumana miloko mithanu na miili aakumiheriwa atthu anyu.” Mwaha wa xeeni? Wa exeeni? Atthu awani iyo saakumiheriwaaya? Atthu a Daniyeli, aYuta. Ni yaakumihereliwe exeeni? Kahi wa Daniyeli paahi, masi muttethe woowaarya wa Daniyeli; moone, muttethe woowaarya wa Daniyeli. Vano, mw’atthu, t’uvi waari muttethe woowaarya wa Daniyeli? [Muthukumano oniira, “Yerusalemu.”—Mol.] Yerusalemu.

³³ Nto vano ninrowa okuxa, khino ophiyerya yeeyo ohiy'ula: Yerusalemu waari woowi? T'ani omupattunxe Yerusalemu? Mootoko wuupuwelela yeeyo? T'ani omupattunxe Yerusalemu? Opattuxiwe liini? Ninoorowa ophiyerya yeeyo, okathi vakhani. T'ani omupattunxe Yerusalemu? Moone, eyo ethu yaamukhaani yiipitihwe wiithela vanlothoni, masi vekeekhai Eyo ennihimya. Ayo, mulopwana. T'ani omupattunxe Yerusalemu, nto opattuxiwe liini? Vaareera. Nto owo ti muttethe woowaarya wa Daniyeli.

³⁴ Ni hiyo ninnisuwela wira mutteth'owo, vano okhanle otakhaliwa mwa iyaakha ikonto piili, onootekiwa-tho ni okhalihwa. Vano okokhorela wa mpaani m'okokhorela onoopaceriwa siiso ntoko waary'aya wopaceryani. Ti yeeyo. Yerusalemu onookhala, vano, ni onookhala mukuttho, mukuttho wa khula nihiku onrowa ovahiwaka-tho siiso ntoko waary'aya wopaceryani. Ninrowa ohalela okela mwa yeeyo yothene, wona waka, ohiy'ula, wala yinci-ene aya.

³⁵ Vano kintthuna musuwele, apatthani, wira okela mwa itthu iya, vekeekhai kinihiya isumana so wiixuttiha. Masi kinookwannya paahi, wira okathi wariirya vale, wala okathi vakhani ohoolo, nakelaru mwa Ikanyeryo iye Thanu na piili, Mihasa Mithanu na miili, Malope Mathanu na maili, itthu iya sothene, kikhanly'aka ohimyaka ni wira, "Munnuupuwela isumana miloko mithanu na miili sa Daniyeli? Munnuupuwela okathi wa Ekereja, okathi ewenly'aya osulu, ni ethu yaakhumelenle?" Ni isumana iya miloko mithanu na miili sa Daniyeli sinikux'aya okhuma owela wa Ekereja mpakha otthika wa Ekereja. Nlaka nenlo ti sinikux'aya. Vano, vano, kahi isumana sothene miloko mithanu na miili sa Daniyeli; epante ya seiyo. "Isumana miloko mithanu na miili sookumiheriwa."

³⁶ Vano, saahikhala sootthuneya thanu na mosa mwa othotola Wawe, amuhimeeryaka ethu yaarowa okhumelela. Vano, saahikhala sootthuneya thanu na mosa sa orwa Wawe. Vano, ohiy'ula, kinoona wira nineemela va mwa Soolempwa sa nipuro naary'ahu-vo voosiis'ula, vaavo vaari-vo sootthuneya thanu na mosa. Hiyo nri va. Vano ninnoona wira saari sootthuneya thanu na mosa, emosa wa yeeyo. Vano nrowe nikuxe e...-kapiitulu yaneexexe, e...-eversikulu yaneexexe...versiikulu 24 ya kapiitulu 9 ya Daniyeli.

*Nto isumana miloko mithanu na miili sookumiheriwa
atthu anyu...*

Vano muupuwele, owo ti mukwaha wothene atthu a Isarayeli anrowaaya okhalana mulaponi mu. Iyo sookumiheriwa. Isumana miloko mithanu na miili sookumiheriwa. Ti yeeyo tu avaheriwaaya aYuta.

...atthu anyu ni muttethe anyu woowaarya,...

Tivo, isumana iya miloko mithanu na miili, vano muhialelele, sinoosuweliha okhuma okathi yoowo mpakha emalelo y'aYuta, nave-tho mpakha emalelo ya Yerusalemu, mpakha onrowaaya okhala muttethe musya onrowa otekiwa. Vano, oh, kinroromela wira ninookela mwa yeeyo, vooreera saana ni voowiixerya ohiy'ula.

...sookumiheriwa w'atthu anyu ni muttethe anyu woowaarya, . . . (Wa exeeni?) . . . wira simalihiwe sootakhala, . . .

³⁷ Owo aamuhimenrye exeeni vano? Owo aaphavela osuwela okathi xeeni onrowa okhala. "Koosuwela wira niri okathi wookiserya." Ntoko siry'ahu vano, "Pwiya . . ."

³⁸ Akavi musaala mu, ohiy'ula, anaamini wira niri okathi wookiserya? Mwiire, "Amen." [Muthukumano oniira, "Amen." — Mol.] Kooxukhuru. Niri okathi wookiserya. Vano nimphavela osuwela, ni Muluku, okathi xeeni paahi onrowaaya okhala. Nihiku xeeni ninkhal'ahu? Tivo ninrowaahu ottuli ni waakuxa maprofeta ala, ni sikina, n'uphavela osuwela vatthu vary'ahu.

³⁹ Nto ti yeeyo Daniyeli iiraly'awe. Owo aarukunxenle wiitho wawe wa Muluku. Akavi amusomme Daniyeli 9 olelo? Nvenxe matata. Vaareera. Munnoona mavekelo awe, moota iiraly'awe olapa wawe ni w'atthu awe, ni olapa wawe wa yoowo mwaneene. Owo aathuna okupali wira onoosuwela okathi awo yaarowaaya otthika, okhala wira aathuna wira atthu ekhale oowiithokiha wira etthike.

Vano, etthu enrowaaka ophavela wira, osuwela okathi xeeni onrowaahu owela, ni waakhaliha atthu oolikana wira ewele, ale yaari oowiithokiha. Ni hiyo noorukunxela wiitho wahu wa Muluku, ni mavekelo ni ovara metto, wira nisuwele, "Pwiya, okathi xeeni onkhal'ahu?"

⁴⁰ Hiyo ninnoona itthu iya sothene soovirikana sikhumelelaka; ninnoona olumwenku mw'evitikavitika. Ninnoona wira okathi ori vakhiviru. E s- . . . yoolempwa eri vaxirini, sothene Muluku ohimaly'awe. Ninnimwiiwa Mukhulupale ahu ahimiyaka sa ekhotto ekina, naanaano va enoorwa. Ninniiwa ohimmwa s'ohoolo, "Muhina, oh, muhina mwa iwoora vakhani nuumala ekhotto, enihimmwa wira ilapo khasinrowa okhala etthu voohikhala ettuurwa ya vulkawu." Ni noosuwela wira nookhalana.

Vano noosuwela, eyo ehinatthi wiiraneya, Ekereja ehaana orowa. Tivo, "Pwiya, niri yayi hiyo?" Mwaha wa yeeyo kinaamini aka wira Owo onoonitthuniherya osuwela. Ninniinula wiitho wahu wira nisuwele. Vano, yoopacerya, nrowe nisuwele.

Isumana miloko mithanu na miili sookumiheriwa atthu anyu . . . muttethe anyu woowaarya, wira simalihiwe sootakhala, . . . emalihiwe etampi, ni wira siliveleliwe soottheka, . . . wira elipihwe exariya

*voohimala-tho, ...wira omaliheriwe wooniheriwa
ni moolumo eeprofeta, ni wira attikittheliwe ole
Oowaarexa.*

41 Iyo saari sootthuneya thanu na mosa sa othotola wa Kapiriyeli.

42 Vano nrowe nipacerye, emosa. Mwaatthunaka okweretha, nyuwo murina ilaapi. Emosa, "Omalihiwa sootakhala," eyo t'itthu yoopacerya. Vano, omalihiwa sootakhala sa Isarayeli, yaawo yaamutthekenle Muluku, onrowa okhala okumiha otakhala wa Yakope.

Vano, wira noonaxaxe yeela, nrowe nikhunle mwa aRooma. Kapiitulu 11 y'aRooma, nipacerye versiikulu 21 y'aRooma 11. Vano ninrowela exeeni? "Omalihiwa sootakhala." aRooma 11:21. Vaareera.

*Maana Muluku ohilevelenle eriiitta y'ephattu...
(Yoowo aari pani? Isarayeli)...musuweleke...
khunrowa woolevelelani nave.*

Vano, kintthuna wira, mwarowa owaani, musome ekapiitulu 11 ila yothene. Miyo kinsoma ela paahi wira...Mulepe ekapiitulu 11 yothene, nto musome.

...woolevelelani.

*Musuweleke oreera murima...wuuma murima
wa Muluku: w'ale yaamorale, ...masi wa nyuwo,
onooreerelani murima, mwathipelela-ru oreera murima:
vaahikhale siiso nyuwo...munimwiikitthiwa, nave
munimwiikitthiwa.*

*Nto awo nave, yaahithipeleleru-...yaahithipeleleru
ohaamini, anoolupanyeriwa-tho: tthiri Muluku
onniwerya waalupanyerya-tho.*

Moone, ahimyaka wira onookhala okathi Amalapo anrowaaya wiikitthiwa, nto Isarayeli onoothikela-tho okela.

*Vakhala wira nyuwo mwaikitthiwe va-vamwirini
wa olivera wa mutakhwani w'ephattu (Amalapo),
khulupanyeriwa voovirikana n'ephattu...*

Hiyo naari oovirikana ni ephattu, amalapo, oohimoreliwa ikharari, oohikhalana Muluku, oohikhalana nrromelo nnakhala. Nto Muluku, mwaha wo omoriwa Wawe ikharari, wira anivahe okathi, oomwiikitthi Isarayeli a exariya mwaha wa soottheka, khwaahiya epantte emosa, wa mu-...mwiri w'olivera woomaala, khukeliha mwiri w'olivera wa mutakhwani, woovirikana n'ephattu.

*...vamwirini...wooreera: khavanrowa otepa ala,
akhanle iritta s'ephattu, olupanyeriwa vamwirini vaya
w'olivera?*

Vaareera, nrowe nitthikele osoma.

Axinn'aka, miyo nkinthuna, wira nyuwo muhisuwele esir'ila, wira muhisooone okhala atthu oosuwela mmansinyu; wira okhala oohoona ohaaphwanya Isarayeli, onaaphwanya atthu a Isarayeli, mpakha Amalapo othene. . .okela.

43 Mpakha Muluku omaliha n'Amalapo, Isarayeli ookhalihiwa oohoona. Awo aahapuwa ekelaka mutampini ni omuthekela Muluku, okhala wira Muluku ookhalihi maitho aya oohoona, wira hiyo nilupanyeriwe-mo. Munniiwa? Versiikulu 26 vano:

Nto tivo Isarayeli othene onimoopowa: . . .

44 Muluku ohaakhaliha oohoona mwayiini mwaha wa nyuwo ni miyo. Awo khanwerya woona, okhala wira Muluku ohaakhaliha oohoona. Nto Isarayeli othene, Isarayeli eekeekhai, onimoopowa. Nlaikha naahimnye exeeni? Ovuwa! "Wira simalihiwe sootakhala sa Isarayeli! Kirwenle woohimeeryani wira onimoorwa okathi sootakhala sa Isarayeli sinrowaaya omalihiwa." Muluku onimwiikittha eritta ya mutakhwani, alupanyerye yeeyo, tho, eritta ele y'ekeekhai-tho.

45 Oh, imaara sikina ennitupiha murim'aka, owoona atthu ale, oohaawa ootakhaliwa wiikitthiwa, ehisuwelaka otthu onrowaaya; ni wuupuwela wira Muluku, mwa omoriwa Wawe ikharari, ohiira eyo wira miyo kiphwanye woopowa. Oopwexa maitho aya wa Mesiya aya, oottiya maaru aya wira ehimwiiwelele Yoowo; nnakhala vo, yaaniweha miiriirya Sawe, ni yaaniweha miiriirya Sawe ni itthu Owo aapak'awe.

46 Matewu, kookupali, kapiitulu 12, ahiiso kapiitulu 8 wala 12, ohimnye wira, "Enamwi Yesu ahaareere opaka miiriirya sinci-ene, nlelo awo khayaawerya waamini." Okhala wira, Muluku iirale, "Awo aakhalana maitho nave khanwerya woona, ni maaru nave khanwerya wiiwa; voohikhala wira yaamoono ni maitho aya ni wiiwa ni maaru aya, vano Miyo kaarukunxa murima." Masi, wira hiyo nikhalane oreeriwa, Owo aahikuruxela ekuwo mmaithoni mw'ana Awe Ene, ohaanyanyala an'Awe Ene vameesa, khwaakeliha moothoiwani wa Eroho, wira Owo awerye ophwanya. . .wira hiyo nikhalane oreeriwa w'okhala akumi, onivaha Ekumi. Versiikulu 26, tho.

Nto tivo Isarayeli othene onimoopowa: ntoko silempwalyaya wira, Onimoorwa akhumaka oSiyoni Moopoli, onoomaliha ohiwelela w'atthu a Yakope:

47 Ayo, Owo onimoorwa Omwaako Siyoni, nimoso wa mahiku awo. Vasulu va Mwaako w'Olivera, awo anoorowa omusuwela Owo, ni Isarayeli othene onosuwela wira ti Yoowo. Amalapo anoomalamala nto. Eritta ele elupanyeriwe-mo, Muluku onookumihya vaavo muhokorokho ohemphwaaya. Nto eriitta ele ya mutakhwani enookhala. . .

48 Nto vano muupuwele, ottuli nno ntoko sisomaly'anyu, Owo oohimya, "Soophuwa iyo saakhanle soowaarya, ni iriitta

iyo saari Yoophuwa yoowaarya, nave muhokorokho oniima mwa Yoophuwa eyo yoowaarya onrowa okhala muhokorokho woowaarya.” Nto vakhala wira Yoophuwa eyo aari Yesu Kristu, Yoowo okhanle soopiili Yoophuwa ni Osuulu wa Davidi; vakhala wira Ekumi ile yaari mwa Yoowo, yaahiwela eviraka mwa nloko n’aYuta vano khwiikitthiwa wa yaawo, ni maitho aya khupwexiwa wira hiyo noone, makhalelo ahu ahaana olikana ni Eritta ele yooreerhiwa. Oh, ayo, munna. Ti yeeyo.

⁴⁹ Muluku oroowiikittha, mwayiini, khwaapwexa maitho wira hiyo nikhalane oreeriwa wo woona, anivahaka okathi. Nto hiyo nineettasa ntoko wira na mutthu. Paulo onnaahimeerya va, “Mwiikasoope, moota muniir’anyu. Mwiikasoope! Vakhala wira Muluku khaalevelenle iriitta s’ephattu, Owo onrowa omorela sayi ikharari eriitta ya mutakhwani ekhanle . . .”

Vano nineetta iwo, niiraka, “Miyo ka muPrespiteriyaano! Miyo ka Mmetotista! Miyo ka muPatista! Miyo ka muPentekosite!” Eyo khenihimya etthu wa Muluku. Muhaana oyariwa vasya ni Eroho Yowarya ele ekhumme mwa Yoophuwa. Masi Owo orwiiye . . .

⁵⁰ Vano, muupuwele, Owo khonaahimya Amalapo. Kinihelamo ela paahi mu wira moone nipuro Amalapo arin’aya okathi aya.

⁵¹ Masi, Owo aarwenle “omaliha sootakhala,” omaliha seiyo. Vano, natthikelaru-tho mwa Daniyeli, ninoosuwela wira mwa Daniyeli, ninniphwanya mu, versiikulu 24. Vaareera. “Omalihiwa sootakhala.” Omalihiwa exeeni? Omalihiwa sootakhala sa Isarayeli.

Wira *yootakhala* exeeni? Onkhala orowa muvirikanyaka etthu. Yootakhala enikivirikanya, onkhala okiirela etthu yoovonyeya. Owiirelani yootakhala, onkhala owiirelani etthu yoovonyeya.

Tivo, Isarayeli aahimwiirela yoovonyeya Muluku. Nto mwa esuman’ela yanamiloko mithanu na miili, exeeni enrowa okhumelela? Muluku onrowa omaliha sootakhala sa Isarayeli. “Omaliha sootakhala,” onrowa okhala, “omaliha ohiiwelela w’atthu a Yakope.” Vano nto Isarayeli othene onooyariwa-tho vasya. Othene aya animwaakhela Eroho Yowarya.

Vano, piili, mulepe eyo vapapheloni vanyu.

⁵² Naamuwerya okhala okathi munci-ene mwa yeeyo, masi nkinthuna opacerya olaleerya yeeyo. Kintthuna kooleleni paahi, wira nwerye wiiwa saana yeela. Nakelela-ru Ikanyeryo Thanu na piili iya, nto munoorowa mukelelaka Ekereja, mukelelaka Ikanyeryo, mwa Ihasara, ni osuwela vathu omphwanyaney’ahu. Vaareera.

⁵³ Ya napiili, “Omalihiwa itampi.” Vano nrowe nimusome-tho, Daniyeli.

...omalihha...sootakhala, ni—ni omalihiwa itampi,...

Eyo ti yootthuneya awe yaneili ya orwa. Yoopacerya, omaliha sootakhala sa Isarayeli; ni omalihiwa itampi. Isarayeli iirale woowi etampi? Awo yiirale vayi etampi aya yuulupale? Awo yiivalaanyihale vayi ni Muluku?

⁵⁴ Vano nwiriyane oratteene. Nrowe nikhunle mwa Matewu Oowaarya 24. Nto va ti nipuro Isarayeli iiraly'awe evonyeryo awe yoowiiva. Ti vaava iiraly'awe etampi awe yookiserya, ni mwaha wa yeeyo ory'awe mukhalelo oryaawe olelo. Matewu, kapiitulu 27 ya Ehapari yooreera ya Matewu Oowaarya, versiikulu 25 ya kapiitulu 27. Nrowe nipacerye ntoko ve—versiikulu 21.

Kuvernatooro aahaakhula khuwiirela, W'atthu ala anli munintthun'anyu wira kootaphuleleni t'uvi? Vano awo yaahaakhula yiiraka, Baraba.

Vano muupuwele, awo atthu a Isarayeli. "Baraba!"

Pilato aahiwiirela, Kimwiirihe exeeni... Yesu yoowo oniihaniwa Kristu? (Nkawiiweni!) Awo othene yaahaakhula wira, Akhomeliwe vamwiikimanyo.

Muupuwele, owo ti Mesiya aya yoole Daniyeli aahimaly'awe wira aamoorwa. Muupuwele voosiis'ula, mwa nisomi va, "Owo onimwiiviwa, kahi mwaha wa yoowo Mmansawe," kahi hat'etthu Owo iiraly'awe.

...Akhomeliwe vamwiikimanyo.

Nto kuvernatooro aahiira, Vano, otthenkeni yoola? Masi awo yaamutepa okhuwela, yiiraka, Akhomeliwe.

Vano Pilato voonaly'awe wira khaawerya wira etthu, masi...ni onyakula wira otepa, nto owo aahikuza maasi, khunyawa ohoolo w'atthu othene, iiraka, miyo nkin'etthu n'iphome ya mutth'ula oohittheka: mwiisoonene...mmansinyu.

⁵⁵ Nwiriyane! Va ti vari ovonya waya. Va ti vari etampi aya.

Nto atthu othene...yaahaakhula, yiiraka, ephome Awe enimorele hiyo, n'an'ihu.

⁵⁶ Ti vaavo awo yiiraly'aya. Owo aamaliha etampi wa yaawo. Owo aakhanle wiiraka sayi etthu ekina woohikhala waalevelele, asuwelaka wira Owo aahaana waakhalihai maitho aya ohooona, wira hiyo nikele? Eri ntoko an'Awe Ene ekhuwelaka mwaha w'Ephome Awe. Nto yaahikhalihaiwa oohooona, ni Owo aanisuwela wira yaakhalihaiwe oohooona. Tivo Owo aakhuwenly'awe wira eleveleliwe. "Mwaalevelele, Tithi, maana khansuwela eniir'aya." Awo yaari oohooona. Mwaha wa hiyo awo yaahikhalihaiwa oohooona. Mwa ohaamini waya awo yaahiira yeela. Masi awo yamoonaru-tho Owo... Amen!

57 “Omalamaliha etampi.” Etampi exeenii? Ohaamini. Awo khayaamini wira ole aari Mesiya. Awo khayaawerya omoona Owo okhala Mesiya, onamwi Owo aapakale khula ethoonyeryo yaathuneya wira Mesiya apake. Masi awo khayaawerya woona. Awo yaari oohoona.

58 Vano mwaawoonaka atthu wira, “Miyo nkinaamini ovoniha wa Muluku. Nkinwerya woona. Nkinwerya woona opatiis’ula wa Eroho Yowarya.” Muhinanariweke n’awo; awo kanoona. Awo aniira, “Nkinwerya woona Mutthak’ola wa Owo Arwaaka. Nkinwerya woona opatiis’ula wa Eroho Yowarya. Nkinwerya woona epyo y’enowa. Nkinwerya woona itthu iya.” Awo kanoona, ni khansuwela. Mwaavekeleleke paahi. Vaareera.

59 Mwa ohaamini waya; masi, awo yamoonaru Owo, okathi onirwaawe-tho, eyo enoomalamaliha ohaamini waya. Oh, wulu! Nrowe nikhunle toko Maphattuwelo 25, kapiitulu 45, niphwanye e—eyooniheryo ya yeeyo. Kookhalana soolempwa va kamosa-kamosa, sa Maphattuwelo 45, nyuwo munlepa soolepa. Oh, moota kiniphent’aka Ehapari yooreer’ela ya khalayi! Vaareera. Vano hiyo noosuwela vary’ahu.

Munniwerya okiwa oratteene, ottuli w’empa? Nvenxe ntata mwaaweryaka vale okiwa. Kookhalana ela vakhiviru vakhani.

60 Vano ninrowa osoma nipuro nimoso na Yoolempwa ela. Kintthuna nwiriyane, nyuwo muhirina Bibilia. Nyuwo murina Bibilia, ti Maphattuwelo. Yoopacerya, nrowe nipacerye kapiitulu 44, opacerya versiikulu 27.

61 Ti Yosefe, ni Yosefe aari ethoonyeryo yoolikana ya Kristu. Hiyo noosuwela eyo. Akavi answela yeeyo? Oonyokhiwa n’axinn’awe. Mwaha wa xeeni? Okhala wira owo aari a erooho, aanoona soowoona, aanitaphulela sooloha. Owo aari mutthu a erooho eriyari y’axinn’awe, ni awo yaanimunyokha. Vano atithi awe yanimphenta.

Ti siiso aary’awe Yesu oonyokhiwa ni ikereja sa muromolelo, masi oophentiwa n’Atithi Awe Muluku. Awo yaamunyokhelani Owo? Okhala wira Owo aari a erooho. Okhala wira... Awo yaahimya, awo yiirale wira Owo aari nahako, xetwani.

62 Nyuwo munnuupuwela etthu axinna a Yosefe yaamwiirelak’aya? “Va onoorwa namaloha.” Munnona? Moone, etthu emosaru. Vano awo yaahimutumiha Yosefe esisapo yohaleleka ophiya esisapo Yuta aamutumihaly’awe Yesu, musurukhu miloko miraru w’eparatha. Khimurihela mulittini, khurowa khwaaleela atiithi aya wira yaahikhala etthu yaamwiivale, owo aahikhwa. Masi owo aahikumihwa mulittini. Kristu aariheliwe mulittini, vano khwaakheliwa osulu. Nto okhuma vaavo owo oronwe nipuro noottukhuwaxa naakhanle mulaponi. Amen! Yosefe aaronwe moonoo woolopwana wa Farawo; ni Yesu oronwe moonoo woolopwana wa Muluku.

Moweereriwani mwawe, ahinatthi wunnuwihiwa . . . Yesu, Owo ahinatthi wunnuwihiwa, aahivira moweereriwani.

⁶³ Vano, kookupali wira aari Billy Sunday, namalaleya ehapari muulupale, iirale, “Khula—khula mwiri waarina Malaikha emilyawu yaakilanthe memmo, nihiku nle n’okhomeliwa, khwira, ‘Mukumihe ntata Nanyu paahi munithoonye. Hiyo ninoorukunxa yookhumelela ela va.’” Masi Owo khaakhanle mwiira.

⁶⁴ Kaifa khwira, “Owo ohiisooopola mmansawe; akina khonwerya owoopola.” Khaasuwela wira aamaliherya nuulumo. Vaakhanle wira Owo aahiisooopola Mmansawe, Owo khaakhanle owoopola akina. Tivo, Owo aahiivaha Mmansawe, wira awoopole akina. Moone, oohoona saana yeeyo. Vano awo . . .

⁶⁵ Nto okathi aary’awe vale moowuunnuwihiwani mwawe, ahiiso, ahinatthi wunnuwihiwa, weereriwa wawe . . . Muupuwele, Yosefe aahiheliwa mukhatteya okhala wira khaatthenke.

⁶⁶ aRooma, ahiiso, mukhulupale a anakhotto a wIsarayeli, iihaniwa Potifari; Potifari aahirowa, aahirowa khweetta mukwaha. Owo aarina mwaar’awe ooreera, nto mwaar’awe khumwiirela Yosefe okela mpaani wira iire etthu, vano khuphavela omwiiraha Yosefe wira etthu yoonanara. Ni owo aari oororomeleya wa Muluku. Kinooleelani, awo kweekwe . . .

⁶⁷ Nyuwo athiyana, miyo kinnookhuwelelakani; vano kinrowa woovenxani, minuutu mmosa. Munnona? Muthiyana mwaapu wootteetheya. Koosuwela wira khokhanle okhalaka mulopwana ootakhala ohitonko okhala muthiyana ootakhala. Masi alopwana ansuwela yeeyo, alopwana ansuwela wira nyuwo mwa mwaana a Muluku, khunamuttottela muraarelo muthiyana, wuuliha muru; hata wira owo iirale exeeni. Owo t’otteetheyaxa, ni nyuwo moosuwela eyo. Owo akhuma vale, khuhiniiseettiha ntoko muhano, munvare ntata mulavule n’uwo ntoko munna. Nyuwo mwa mwaana a Muluku. Muhiireke itthu iye sootakhala. Nkanweheni Yosefe, owo aari ethoonyeryo wa nyuwo.

⁶⁸ Nto okathi mwaara a Potifari, muthiyan’ola ooreera, oottittimiheya, muulupale, mmosa w’axithiyana aalupalexa yaakhanle mulopani, aamuvekenly’awe ni omuthipelela. Nto owo khurukunuwa, vano owo khuphavela omupatikha. Vano owo khimutatha mpakha orula ekhasako awe, khimutthyawa. Ayo, mulopwana. Vano varuuly’awe, awo khimuhimyana etthu yoowootha yoowo, khwiira wira owo aarimoorwa omutuphela, vano owo khuhiya yawawe . . . owo khuhiya ekhasako awe vaavale. Nto mwaha wa yeeyo owo aahikela mukalapooso. Masi, mukalapooso, Muluku aari ni yoowo, hata wira awo yaamuhela vayi.

⁶⁹ Owo aari ethoonyeryo ya Mwaana a oreeriwa. Sothene Yosefe iir'awe saanikelela ohoolo. Ni okathi Yesu onthik'awe oMileenyu, tivo mothakoni onrowaaya ophuwa-mo ntoko ethutu. Sothene Owo oniir'awe sinrowa okelelaka ohoolo. Owo ti Mwaana a oreeriwa. Mapuro othene aapwehiwaawe Yosefe, waanireerihiwa. Mapuro othene Yesu onkhal'awe, ti wooreerihiwa. Tivo, mmuhele Owo mmurimani mwanyu mureerihiwe.

⁷⁰ Tivo hiyo ninnoona vano, wira, Yosefe nto aahiheliwa mukhatteya. Nto mukhatteya yaahikhala alopwana aili; mmosa aya aahipweteya, nto mukina aahoopowa. Yesu, moweereriwa Wawe vamwiikimanyo, mmosa aahipweteya nto mukina aahoopowa.

⁷¹ Okathi Owo onnuwihwaawe, Owo oronwe moonoo woolopwana wa Muluku. Okathi Yosefe onnuwihwaawe, owo aahirowa moonoo woolopwana wa Farawo, ni khaavo hata mutthu aakhanle olavulaka ni Farawo ahitonko olavula ni Yosefe toko khutthuniheriwa.

Nto okathi Yosefe aakhum'awe empa ya mwene . . . Oh, wulu! Okathi Yosefe aakhum'awe empa ya mwene, malope yaaniruma, nto atthu yaanithimakela ohoolo wawe, yiiraka, "Mukokhore! Yosefe onimoorwa!" Amen!

Nto okathi Yesu onikhum'awe moonoo woolopwana wa Oowerya sothene osulu, malope anrowa oruma. Ni makutha othene anrowa okhuniwa, ni malumi othene anrowa ohimya wira, "Yesu Onimoorwa!" Vekeekhai! Masi vakhala . . .

⁷² Ni, muupuwele, okathi aakhoottiwaawe n'axinn'awe, owo iirale exeeni? Owo aarina mwaar'awe Mmalapo; owo aamuthenle muthiyana a wEjitu. Yesu vakumihiwaawe eriyari y'axinn'Awe ottuli wu, aYuta, Owo omuthenle Mwaakameliwa Mmalapo. Masi vano, nuvira iyaakha, vaayariwaaya aana, Efrayimi ni Manase, owo aahikhalana emusi.

⁷³ Vano, nihiku nimoso, axinn'awe khurwa omuthotola. Nwehe. Hiyo ninnimusuwela wahala ene, moota aahenly'awe etthu yaamukhaani mme, wira etthike. Ni iira ntoko khaawerya olavula ni nntaava naya; aarina mulipa-ootaphulela, a eHeperi, yoowo mwaneene ary'ene muHeperi. Vano muhim'aya aahirwa. Awo khayaamusuwenle. Owo aari mukhulupale oowerya.

Ni naanaano va, Kristu onnaathotola aYuta, onnivoniha iretta saya n'itthu, nave awo nlelo khansuwela wira Owo ti Pani, Mesiya yoole.

Nrowe nipacerye versiikulu 27 ya kapiitulu 44.

*Vano tith'ihu murumeyi anyu oonihimeerya wira,
Moosuwela wira mwaar'aka okiyarenle—mwaar'aka
okiyarenle aana aili:*

Nto mmosa aya ookirimeela, . . .

Owo aari Yosefe, yoowo ene awo yaalavul'aya-no.

...miyo khwira, Vekeekhai oookhuuriwa kapattikapatti; ni nkitthikenle-tho omoona:

Vano nyuwo mwamukuxa-tho ola, nto yamukhumelela etthu yootakhala, munoomoreliha ipwi saka mmahiye mwaha w'othunku.

⁷⁴ Awo yaahikhalana Peniyamini mwaamukhaani iwe, muhim'awe. Nyuwo munnisuwela t'ani Peniyamini onimuthoonyery'awe? Nikhuru nla na naanaano, n'aYuta eekeekhai ooloka anthukumana iwe vano wira emalele ikonto miloko muloko ni miloko mixexe n'atthu ikonto xexe, nlo—nloko nla ninoorwa. Kahi alavilavi ala a Wall Street, nnari, nnari; awo-tho malaxi wira epahiwe. Awo kahiyo aYuta. Awo kahiyo aYuta. aYuta eekeekhai ti maPeniyamini ala axikhaani anikhumelela nno, ni ahinatoko hata wiiwa Masu a Yesu Kristu.

Vano nto murwe wa miyo... ni atith'inyu... ni atithi aka, mmiravo ahikhanle ni hiyo; woonaka wira ekumi aya ni ekumi ya mmirav'ola eri emosaru.

⁷⁵ Ekumi ya Muluku Mwaneene ti yoophitaana ni Isarayeli. Owo omuthenle yoowo. Ninoorowa ophiyerya yeeyo muhina mwa minuutu vakhani, Apwiya yatthuna vale. Owo omuthenle Isarayeli. Ekumi Awe ephitaanne ni yoowo. Siiso miyo kiphitann'aka ni Muhano Branham ottuli iwe, amwaar'aka, ni nyuwo moophitaana n'amwaar'inyu. Ekumi anyu evitikeleliwe memmo. Ni Muluku omuthenle Isarayeli. Nto yaari exeeni iyo? Yakope iirale, "Ekumi aka evitikeleliwe ni ephitaanyiwe mwa mwaan'ola. Miyo kino..."

Nto enimwiiraneya, yoonaru wira mmirav'ola khakhanle ni hiyo...

Yosefe aarowa ohalana mmiravo, moosuwela. Hiyo ninnimusuwela wahala ene.

...nto awo animookhwa, atithi awe: siiso arumeyi anyu anookuruxela mmahiye ipwi sa murumeyi anyu atiithi ahu mwaha wo waawereya murima.

Mwiiwe ovara metto iwo Rupeni oniir'awe vano.

Maana murumeyi anyu t'olipanne mmirav'ola ohoolo wa...wa tiithi aka, kiiraka, Kaahookoloxeryeni-ru...kaahimuhokoloxerye wa nyuwo, miyo kirina mulattu wa mahiku othene vamaithoni v'atiithi.

Vano tivo, kinoovarelani metto, mmuhiye murumeyi anyu ahale nipuro na mmirav'ola...

Oh, wulu! Moone, owo eemenle vale ohoolo wa Yosefe, muhim'awe. Ola ti Yosefe, nave owo khommusuwela. Oh, mulipelele Mileeniye ile epacerye, munna!

...vano nipuro na mmiravo epoth'anyu pwi'yaka;...

Mmwiiwe, amuhimyaka owo, “pwiya.”

. . . vano mmiravo aroweke n’axuulupale awe.

Maana kinwerya sayi ohokolowela ohoolo w’atiithi, mmirav’ola ahikhanle ni miyo? kihoone ohaawa onrowa waarweela atiithi aka.

⁷⁶ Avarelaka metto, avahereryaka ekumi awe yoowo! Moota aYuta ale anrowaaya weemela vale yookonleene matata! Nwehe. Nwehe vano versiikulu 45, . . . Nwiriyanne oratteene, muhialele. “Okathi Yosefe ooceel’awe . . .”

Okathi uwo Yosefe aahooceela . . . -lipiha—wiilipihatho ohoolo w’ale othene yaari ni yoowo; . . .

Munna, owo p’ukathi etampi enrowaaya omalihiwa. Ohaamini onrowa omalamala.

. . . nto owo aahikhuwela, ni aahiruma atthu othene orowa . . . ekhume. Nto khaakhanle hata mutthu ni yoowo, okathi Yosefe iisuwelinhaawe w’axuulupale awe.

⁷⁷ Exeeni iyo? Hata amwaar’awe ene yaahitthikela mpaani mwa mwene. Oh, wulu! Mwaakameliwa Moovuwani, okathi Yesu onthik’awe (Ninoophiyerya yeeyo va.) wira aisuwelihe Mwaneene.

Nto owo aahinla ni wiituperya: . . .

Yosefe khaawenrye-tho ovilela, nto aahikhuwela.

. . . vano atthu a wEjitu ni mpaani mwa Farawo yaahimwiiwa.

⁷⁸ Mpakha mpaani mwa mwene, atthu yaahimwiiwa Yosefe anyakulaka. Vano, ele yaari ethoonyeryo ya Kristu akumanaka n’aYuta, wira, Owo onnisuwela wira ohaakhalaha ohoona wira hiyo nikhalane okathi. Masi okathi Owo onaarweel’awe-tho, etampi y’atthu a Isarayeli enoomalamala.

Vano Yosefe aahaahimeerya axuulupale awe wira, Miyo ki Yosefe; . . .

Nyuwo munoona wira Yesu onrowa ohimya exeeni? “Miyo ki Mesiya anyu. Miyo ka Yoole mwaamukhomenly’anyu.”

. . . atiithi nlelo aakhala? Nto axuulupale awe khiyaawenrye omwaakhula; okhala wira yaanithukumela ni woova ohoolo wawe.

⁷⁹ Oh, kihaana weemela vaava minuutu mmosa paahi. Nrowe nimukhunle Zakariya kapiitulu 12. Mukhunle ni miyo vano Eliivuru ya Zakariya, kapiitulu 12 ya Zakariya. Nto khino kinookuxa okathi munci-ene opacerya olaleerya yeela, masi ki—kinroromela wira nnari. Ni ki—kintthuna wira mwiiwe saana, vanci-ene.

⁸⁰ Zakariya, nrowe nikuxe kapiitulu 12 ya Zakariya, noone etthu Owo onrowaawe ohimya vano okathi Owo onrowaawe okhala ohoolo w'axinn'Awe. Zakariya 12, ni 10. "Omalihiwa etampi," vano. Vaareera, kapiitulu 12 versiikulu 10.

⁸¹ Nwehe. Nto vano owo onihimya va mwaha w'osuulu ohanle; okutteleliwa wa Yerusalemu; nxeni ni anakhotto anookuxiwa, ni siiso; itthu sothene siniphiya woomalelani vano; ela enihalela okhala eMileeniyu, ehalelaka opacerya eMileeniyu naanaano va.

Vano kinoohela vatthokoni va Davidi, ni mw'atthu a oYerusalemu, erooho ya (exeeni?) mahala . . .

Amen! Mahala ooreerexa!

. . .vatthokoni . . .atthu a oYerusalemu, (Daniyele "muttethe woowaarya"), erooho ya mahala ni yoovekela: nto awo anookiweha miyo ole amuhommy'aya, awo anoomunlela yoowo, ntoko sininleliwaawe mwaana mmosene, anookhupanya mwaha wa yoowo, ntoko sinikhupanyeriwaawe mwaana oopacerya.

⁸² Nwiriyaane, wunla xeeni onrowa okhala okathi Owo onrowaawe okhala iwe, aisuwelihaka Mwaneene wa yaawo, ntoko Yosefe siiraly'awe! Nwiriyaane.

Vano nihiku nenlo onookhala wunla wuulupale oYerusalemu, ntoko wunleliwa wa Hadad- . . .

Nkinwerya oromola nsina nlo, H-a-d-a-d-i-r-i-m- -o- . . .

. . .Hadadirimmoni o . . .Megido—Megido.

Nto mulaponi onookhala wunla khula etthoko meekh'aya; etthoko ya Davidi meekh'aya, n'axaar'aya meekh'aya; ni etthoko ya Natani meekh'aya, ni amusi meekh'aya;

E . . .etthoko ya Levi . . .n'axaar'aya ni amusi meekh'aya; . . .ni Ximeyi ni awaya meekh'aya;

Ni khula etthoko enihala, khula etthoko . . . n'axaar'aya meekh'aya.

⁸³ Nave-tho awo animuuliwa muru mmansaya, okathi anrowaaya ophwanyaneya vale ni woona wira Yoole ene awo yaamukhomenly'aya khimukhootta, omphwanyaneya vale, Yosefe aya oophenteya. Onookhala wunla! Nto awo animwiira, "Makhwatta ala Nyuwo muphwanyale woowi?"

⁸⁴ Owo iirale, "Owannyaya apatthani Aka." Munnoona enihimy'aka? Omalihiwa etampi, ya ohaamini, ti yeeyo Owo onirweel'awe.

⁸⁵ Nto eyaakha ela yanamiloko mithanu na miili ya Daniyele, esumana yanamiloko mithanu na miili, kiireke, enrweela omaliha etampi, okumiha. Munniiwa saana vano? T'evi ekhanle

yoopacerya? “Omalihwa sootakhala.” “Omalihwa etampi.” Tthaaru, “Oleveleliwa soottheke.” Nyuwo munlepa.

Kaahikhalana Soolempwa sikina soophiyaka thanu na mosa vo, masi kirootupha, okhala wira onooviha. Khaninthuna okuxa okathi munci-enexa. Kintthuna kiphiyerye yoowaattexa ntoko sinwery’aka, masi kahi woopisihani okathi munci-ene. Vaareera.

⁸⁶ “Oleveleliwa soottheke.” *Soottheke* ti “wira soonanara,” ntoko awo siiraly’aya vamwiikimanyo. Owo aahilevelela, masi khenrowa oheleliwa yaawo. Khayaaheliwe yaawo. Mwaha wa xeeni? Okhala wira awo yaahikalihwa ohoona nto khayaawenrye wona. Nto mwaha wa xeeni yaakhalihwaaya ohoona?

Nyuwo muniira, “Ahe, khino, olelo..okhala wira nkinoona.” Nyuwo muhinoona mwayiini. Awo yaakhalihwe ohoona okhala wira Muluku t’akhalihale. Masi nyuwo khamunoona okhala wira munoolakela ohoona. Khuuvo waataanihiwa wa nyuwo. “Mwaahaaminiru wira Miyo ka yoowo,” ohimnye ti Yesu, “munimookhwa ni itampi sanyu.” Ti yeeyo.

⁸⁷ Vano nrowe nitthikele-tho mwa Zakariya, kapiitulu 13. Vano nrowe niiwe va. “Waataaniha.” Vano vatthu ela. . . Miyo kaamuphavela mutthu, wiiwa yeela—wiiwa yeela, masi khino Apwiyi animwiira mwa enamuna emosa.

Nihiku nenlo enookhala . . .

⁸⁸ “Nihiku nenlo.” Dr. Scofield ookhalana va soolepa sawe sa vathi, ahiiso itiitulu sawe s’osulu, “Ale yaahanle . . . Ale yaahanle oorukunxa murima yaahithoonya vamwiikimanyo.”

⁸⁹ “Wira sileveleliwe soottheke.” *Soottheke*, “etthu mwiiraly’anyu voovonyeya, mwaasuwel’anyu oratteene, wira khamwaarina wira.” “Kuupuwela-ru yootheka mmurimani mwaka, Muluku khanikiwa.”

⁹⁰ Vano, mwa Zakariya kapiitulu 13, nrowe nipacerye 1—versiikulu 1.

Nihiku nenlo enoophattuwa ehime ya maasi vatthokoni va Davidi n’atthu a oYerusalemu mwaha w’etampi ni . . . soonanara.

⁹¹ Enookhala empa enrowa otthukuwa. Mutthikeleke; ninoowerya otthikela nisomaka. Kintthuna wira mulepe yeeyo wira mwasome. Masi vano, kookhalana yoolempwa ene va wira nipacerye versiikulu 6 nisome mpakha 10. Vaareera, nrowe nisome vano noone, nisome mpakha 9, kiireke.

Vano akhala onimukoha wira, wira ti yayi. . . Mirala xeeni iyo mmatatani mwanyu? Vano owo onimwaakhula, Iye. . . seiyo Miyo kirin’aka saari. . .

(Nrowe noone.) . . . *waakhula, Ti seiye kivulalihiwaaka owannyaya apatthani aka.*

Nvenye, O xoowa, nwanane makampusi, ni mulopwana okhanle mwaapar'aka, anihimya t'APWIYA a anakhotto: munvulalihe makampusi, nto ipwittipwitthi sinoomwareya: vano kinoorukunxela ntata naka w'anamwane.

⁹² Vano, Yesu aahihimya Yoolempwa eyo. Moone, “Onvulaliha Makampusi, ni omwarya ipwittipwitthi.” Masi nwehe eparakrafu enttharelana. Owo ohimnye nipuro nenlo paahi. Masi nwehe nuulumo ninttharelana nnihimya, epantte enttharelana. “Nto Miyo kinoorukunxela ntata Naka w'anamwane.” Exeeni? Nihuru na Peniyamini ninkhumelela vano. “Miyo kinoorukunxela ntata Naka w'anamwane.”

⁹³ “Munvulalihe Makampusi.” Isarayeli, toko, Isarayeli aahinvulaliha Makampusi, khumwaraxela ipwittipwitthi mulaponi mothene. Masi Muluku iirale, “Miyo kinoorukunxela ntata Naka, wira kaathukumanye anamwane nihiku nookiserya.” Liini? Okathi onrowaaya oleveleliwa soothheka.

⁹⁴ Isarayeli onimooopowa, khula mmosa a yaawo. Nrowe nimukhunle Yesaya. Yesaya, kapiitulu 66 ya Yesaya, nisome vakhani paahi. Nto noone etthu Muluku onihimya'awe ya Isarayeli oopowaka, okathi onrowa otthuneya wira oopoliwe Isarayeli. Nwehe moota enrowaaya waakuva. Mwa Yesaya, kapiitulu 66 versiikulu 8. Mwaatthunaka osoma yothene eyo, vaarera.

Tani aiwale-tho etthu siisa? t'ani oonne etthu ntoko yeela? Nloko ninoowerya opakiwa ni oyariwa . . . nihiku nimosaru . . . nihiku nimosaru? . . . vano Siyoni opaceryaka owereiya, ohaayara an'aya.

⁹⁵ Siyoni amalaka-ru wona wira ole aari Mesiya aya, aahiyariwa-tho vasya, nihiku nimosa. “Oleveleliwa itampi, ni oleveleliwa soothheka, soonanara.” Oh, wulu! Awo yiirale ele yaari yootakhala, ele yaari yoonanara. Oleveleliwa waahiiriwa mwaha wa soothheka saya.

⁹⁶ Xexe. “Olipihiwa exariya voohimala-tho.” Eyo t'itthu yaneexexe Owo aarwenly'awe. Yaneexexe, Owo aarwenly'awe wira, “O—olipiha exariya voohimala-tho.” “Omaliha etampi; oleveleli; ni olipiha exariya voohimala-tho.” Okathi soothheka sa Isarayeli saaphiyaly'aya woomalelani. . . Okathi soothheka sa Isarayeli. . .

⁹⁷ Vano ninrowa o . . . Kinththuna wira nvare ela, okhala wira namooniherya-ru muthiyan'owo, ni ehanasi yariheliwa-ru ota, munoorowa otthikela-tho Yoolempwa yeela. Muhivonye olepa yeeyo. Okathi soothheka sa Isarayeli siniphily'aya woomalelani, Satana, yoowo okhanle mulipa-oowootherya aya ni mulipa-oonootherya hiyo, Satana onrowa otthukiwa mowiixani. Okathi

exeeni? Okathi oniruuhiwaaya olipihiwa exariya voohimala-tho, etthu ehinweryaneya omala, sothene saaruuhela ohikhala exariya sinoomalamalihiwa.

⁹⁸ Nrowe nikuxe Wiisuupulula kapiitulu 20 versiikulu 13, minuutu mmosa paahi, nto nisome va minuutu mmosa paahi. Wiisuupulula 20, 13 . . . Nnari, kilevleliwe. Wiisuupulula . . . 1 mpakha 3, ti yeeyo. Nkoonale nlepa nle naamukhaani variyari vaya. Oviheriwa waka va onookikela mmaithoni. Wiisuupulula kapiitulu 20, nrowe noone.

Numala kaahoono nlaikha naakhuruwa wirimu, naakunxe ihulelo sa mweepiphini n'ikwirinti yuulupale mmatatani.

. . . naahivara ehanas'ile, enow'ele ya khalayi, okhanle xetwani, ni Satana, khumutthukwa iyaakha ekonto emosa,

Nto aahimurihela mowiixani, khumutthukwa ni muhulelo, khimuhela ekanyeryo, wira ahiwootothe-tho atthu, mpakha ovira iyaakha iyo ekonto emosa: nto nuvira yeeyo. . . ohaana otaphuliwa okathi vakhani.

⁹⁹ Olipihwa voohimala-tho . . . "Olipihwa exariya voohimala-tho," Satana ory'ene mowiixani. Nto okathi Owo oniiir'awe yeeyo, onimutthukwa xetwani yoowo owootonthe atthu.

¹⁰⁰ Vano nrowe nikhunle mwa Habakuki, kapiitulu 2. Habakuki, kapiitulu 2. Nto vano ninrowa woona mwaha wa xeeni Owo ontthukel'awe enow'ela ya khalayi, ni etthu yiireliwaaya, ni etthu eniiraneya naanaanoru eyo emalaka-ru otthukiwa. Okisivela yeela, ankhini nyuwo? Eyo—eyo enniniixuttiha etthu. Habakuki, Habakuki, kapiitulu 2 versiikulu 14, kookupali wira ti yeeyo, kintthuna kosome. Okathi eniireyaaya yeela . . . Nwehe.

Tthiri elapo enoosareya osuwela ni ovuwa w'APWIYA, ntoko maasi ansary'aya ephareya.

¹⁰¹ *Brrrrr!* Wulu! *Whish!* Mwa moolumo makina, okathi nwanani oniiir'awe owaleliwe, omala w'etampi oniira orwiiyeene, olipihwa w'exariya voohimala-tho woophiya, Satana onootthukiwa mowiixani, nto osuwela w'Apwiya onoosareya elapo ntoko maasi ansary'aya ephareya. Amen! Avuwihwe Muluku! Enimoorwa, munna, enimoorwa! Athiyana anrowa okhala ahano, alopwana anrowa okhala oolakeya. Amen!

Okathi osuwela w'Apwiya onrowaaya osareya elapo n'ephareya n'erimu;

Nto, oh, murim'aka onniipulela, oninlela nihiku nenlo n'otaphuwa woosivela,

Okathi Yesu ahu onrwaawe-tho mulaponi.

¹⁰² Amen! Vaareera. Vano, eMileeniyu nto enookhala. Owo p'ukathi eMileeniyu, okathi Muttetthe onrowaaya otekiwa.

Yaneexexe . . . Kookhalana-tho Soolempwa soophiyaka thanu na mosa, masi kinimwaakuva. Vano, natthika vale, kinookuxa Soolempwa iya sikina; masi wira koovaheni muupuwelo ene muulupalexa.

¹⁰³ Thanu. “Omaliheriwa wooniheriwa ni moolumo eeprofeta.” Moone, Nlaikha nle naarwenle omaliherya wooniheriwa ni moolumo eeprofeta.

Miyo—miyo okinanara ohimya ela. Masi, mulipa-oolepa mmosa muulupale, kaasom’aka sa yoowo nihiku nlo, vakhala wira owo khaatapanyale eyo! Owo aahimale “Ele yaary’aya . . .”

Vano, wira kooniherye elolo xeeni . . . Oh, kileveleliwe, nkilakenle ohimya yeeyo. Mukilevelele. Nkilakenle ohimya yeeyo, vekeekhai nkilakenle. Nnari. Mu—mu—mutthu oohikhalana muttikitheliwo, moone.

Mulopwan’owo iirale, “Munnoona va wira soowoona ni s’eprofeta kweekwe saatthuniheriwe ekereja y’eYuta.” Nto khwira, “Okhuma okathi wa Daniyeli mpakha ohoolo, Daniyeli varwiiy’awe, yaahimya wira awo khayaarowa okhalana-tho yoowoona wala oprofeta.” Khwira, “Itthu iya sothene olelo awo anlavul’aya, sa okhalana soowoona ni oprofeta, sothene saari sa xetwani,” wira, “khiyaakhanle etthu ene eyo ntoko soowoona ni oprofeta.”

Munna, yaahikhala maprofeta ituusiya sene nuvira Daniyeli. Ni aahikhala Yohani Mpatisa. Aahikhala Yesu Kristu. Yaahikhala maprofeta okathi wa Waataana Wa Naanaano. Saahikhala soowoona. Yaahikhala Malaikha.

Vanweryaneya sayi mutthu ohimya yeeyo? Masi, moone, eyo enkhala ni niwoko mwaha wo wiisoona, weererya okeliha etthu mw’atthuni, okhaliha mwiixuttiho mwaamukhaani wa ekereja, wala etthu yaamukhaani ehirina maana, wira ekhale y’ekeekhai w’atthu. Nto atthu yaahikhalane Eroho Yowarya, animootothiwa ni yeeyo.

¹⁰⁴ Vano, nihikuxeke ele mutthu ehimaly’awe. Vano, khiivo hata Yoolempwa enlipiherya yeeyo. Vano kinwerya sayi okuxa yeeyo? Ahe, nrowe noone vekeekhai ele ekhanle omaliheriwa. Nwehe! Owo aarwenle wira yeeyo, omaliherya wooniheriwa ni moolumo eeprofeta.

¹⁰⁵ Vano, nrowe nikhunle-tho Eliivuru ya Daniyeli, vaavo naary’ahu-vo. Eliivuru ya Daniyeli, ninoosuwela saana etthu Eyo ehimaly’aya. Vano nrowe nikhunle Daniyeli kapiitulu 12. Vano, nirowaka mwa Daniyeli 12, vano, nipacerye. Nto nisome okhuma . . . Mwarowa owaani, kintthuna musome okhuma versiikulu 1 murowaka ohoolo. Nrowe nisome paahi okhuma versiikulu 1, mpakha 4.

Okathi uwo onookhumelela Mikayeli . . . muulupale a malaikha onrowa okhumelela mwaha w'ana a nloko nanyu: . . .

Vano, nno ti wookiseryani w'okathi.

. . . nto onookhumelela okathi w'ovelavela, ohinakhumelele wopaceryani . . . w'elapo . . .

Owo p'ukathi nwanani a Kristu, nakhavalo ola a Ekanyeryo Yoopacerya onikhum'awe, okathi owo onikhumelel'awe.

. . . hata mpakha okathi ula: . . .

Kahi okathi Titu okuxaly'awe makokoro a oYerusalemu. Eyo yaari nipuro nimos paahi. Nwehe okathi nwanani a Kritstu ula, mukhulupale owo aarowa orwa, nkawehani okathi onirwaawe.

. . . mpakha okathi yoowo: vano okathi yoowo atthu a nloko nanyu animoopowa, khula mmosa onrowa ophwanywa olempwe muliivuruni.

Aleluya! "Atthu anyu," Isarayeli, "anrowa olempwa muliivuruni."

Vano anci-ene a ale anrupa mmahiye vathi anoovenya, akina anoophwanya ekumi ehinimala, akina anoophwanya wuuliwa muru n'utakhaliwa ohinimala.

¹⁰⁶ Vanweryaneya sayi owo okhala Titu owo akuttenleene makokoro a oYerusalemu? Vaaweryaneya sayi okhala? Khivaaweryaneya okhala. Moone, owo onlavula mwaha w'okathi wookiserya, woohihimuwani. Eyo ekeekhai? Vano:

Vano atthu a ankhili animwaarya ntoko waarya wa wirimu; n'ale anaakhaliherya . . . anaakhaliherya anci-ene mu'exariya . . . ittheneeri mahiku othene . . .

Nwiriyaney! Ela va, otthittiwa, wooloka w'ekeekhai.

Masi nyuwo, Daniyeli, mmalihe moolumo ala, mutthuke eliivuru, mpakha mahiku ookiserya: . . .

¹⁰⁷ Exeeni iyo? Oh, aleluya! Munnoona, mw'atthu? Wiisuupulula nno wa Yesu Kristu, ni wa Owerya Wawe, wa Orwa Wawe, wa okathi wookiserya, waatthukiwe ekanyeryo mpakha okathi ula. Ti yeeyo owo aarwenly'awe wira. Ahiipitheriwa ale oosuwela; khivanxankiha, awo otthunaka ohelela "otthittiwa," ottuli, wa "ohikhala maprofeta," ni itthu sothene ottuli. Eyo khenrowa olipalipa. Masi yoowoona, yoowoona ela, yaahitthukiwa mpakha va naanaano va. Nto ti vaavo kinihel'aka waamini waka, wira Muluku onimuupulula isumana iyo miloko mithanu na miili. Amen! "Mutthuke," Owo aahihimya, "mpakha okathi wookiserya. Mmalihe Masu ni mutthuke Eliivuru mpakha okathi wookiserya."

¹⁰⁸ Owo iirale exeeni? Omaliherya wooniheriwa ni moolumo eeprofeta! Daniyeli aahilaleerya itthu iya. Owo aahoona

mwa yoowoona, ni Nlaikha naahikhuruwa wira nimaliherye wooniheriwa, ni wira nimaliherye moolumo eeprofeta. Awo anniwerya osoma, masi khanwerya osuwela saana, mpakha okathi wookiserya. Okathi wookiserya, okathi wookiserya exeenii? Emalelo ya esumana yanamiloko mithanu na miili, okathi mukhulupal'owo, nwanani a Kristu, onrowaawe osuwelihiwa, okathi ula, aikhalihaka mmansawe Muluku. Ninsuwela sayi wira ela ti yoothukiwa mpakha okathi yoola? Daniyeli onoomaliharu; ela ekapiitulu yookiserya ya Daniyeli.

¹⁰⁹ Munna muthiyana Simpson ookileela exekuwa yeela, owo iirale, “Munna Branham, koosoma Eliivuru yothene ya Daniyeli. Miyo—miyo nkaasuwenle-tho okathi omalihaly'aka, ovira-mo, ovikana kiiraly'aka okathi opaceny'aka.” Ela eri va, Munna muthiyana Simpson, mwaary'ene vaava ohiy'ula. Kookupali wira kinnimoona okilante vale. Nkihimale etthu mukaaroni empuruliwa. Kaaroomaala, 'okhala wira koonna wira khino kaamuphiyerya yeeyo.

Masi, yoowoona Daniyeli oonaly'awe, ohitto iwe waattamela omuro, yaaroothukiwa, “mpakha okathi wookiserya.” Ti... Mukihyiye kikelele ohoolo paahi kisome va. Munnona?

Masi nyuwo, O Daniyeli, mmalihe moolumo, muthuke eliivuru, mpakha okathi wookiserya: anci-ene anoothimakela nno ni nno, ni osuwela onimuncerereya.

Vano miyo Daniyeli kiira kiwehaka, nto, ni, yeemenle vale... aili, ... mmosa ekhopela emosa... ya muro, nto mmosa ekhopela ekina ya muro.

Vano mmosa aahimuhimeerya mulopwana aawanre e—ekuwo y'eliinyu, yoowo eemenle vasulu va maasi a mur'owo, Itthu iya sootikiniha sinrowa omaliheriwa liini?

Vano nwiriyane.

Vano kaahimwiiwa mulopwana aawanre ikuwo s'eliinyu, yoowo aari vasulu va maasi a muro, okathi ovenxeny'awe ntata noolopwana ni ntata noothiyana wirimu, khulapela nsina na ole onkhala mahiku othene wira onookhala okathi, okathi, ni nuusu n'okathi;...

Vano, nookhalana eyo—yeeyo ene, “Okathi, okathi, ni nuusu n'okathi.” Vano nwehe okathi onikelel'ahu isumana miloko mithanu na miili, moota enikhumel'aya yeeyo. Owo p'ukathi esiiri enrowaaya wuupululiwa. Vaareera. “Okathi, okathi, ni nuusu n'okathi.”

...ni okathi owo onrowaawe... (“owo,” nsina na mutthu vano, nwanani a Kristu) ...onrowaaya omalihe- ...omalihwiwa omalihwiwa omwareya owareya w'atthu oowaarya, (owo p'ukathi owo onihonon'awe

waataana wawe eriyari y'esumana), *itthu iya sothene* sinoomaliheriwa. (Amen.)

Nto miyo kaahiwa, masi nkaasuwela saahim'yaya: tivo miyo kaahikoha, O . . . Pwiya, itthu iya sothene sinrowa omala liini?

Nto owo aahikaakhula wira, Muroweke ephiro anyu, Daniyeli: moolumo ala animwiipitha n'utthukiwa mpakha okathi wa . . . [Muthukumano oniira, "Wookiserya."—Mol.]

Oh, muhiliyale eyo!

. . . mpakha *okathi wookiserya*.

Atthu anci-ene anooreerihwa, anoolipiheriwa, animweehereriwa; masi atthu ootakhala murima anootepa wira sootakhala: khaavo a yaawo onrowa osuwela; masi atthu a ankhili anoosuwela saana.

¹¹⁰ Mutthaka w'okathi wookiserya onimuupulula yeeyo; okathi wookiserya w'ekereja. Ovuwa! Whish! Eyo eri vo! Oh, wulu! Eyo ennikittikinya, wupuwela yeeyo, esiiri! Itthu olumwenku wa mukereja oninyemul'aya ni maitho, ni wira, "Eyo ethiru." Esiiri ya Pani aari Yesu Kristu; kahi Mutthu aneeraru, kahi Mutthu anenli, kahi Mutthu aneeraru, masi oMutthu *ene* wa Muluku. Isiiri iye sothene sikina sa Muluku sinimuupululiwa, okhala wira yoolempwa va muLiivuruni mu, ni sinrowa wuupululeliwa nloko n'okathi wookiserya. Awo khanwerya wona eyo museminariyu, ni ixikola, ni miromolelo, ntoko aYuta yahaawenry'aya omoona Yesu okhala Mesiya. Khivanxankiha awo otthunaka wupuwela wira mwa mulolo. Khivanxankiha awo wupuwelaka wira muroovahuwa. Khivanxankiha awo ohiweryaka osuwela xeeni nyuwo ohirettehaka n'awo. Okhala wira, wookhala Owerya ni yoowoona ottuli waya, Masu a Muluku yuupululiwe, wira akhalihe Ekereja oratteene wa Okuxiwa n'urowa Owaani. Ayo. "Atthu anci-ene anoothimakela nno ni nno, ni osuwela onimucererya." Vekeekhai.

¹¹¹ Vano, etthu ekina yaarowa osuweliwa t'ivi? Nkawehani olelo, mukereja. Ela eri va. Kinroromela wira nkinisikuliha, masi kihaana ohimya. Opaka . . .

¹¹² Nihiku nenlo onookhumelela nwanani a Kristu.

¹¹³ Vano, muupuwele, napacerya-ru Ikanyeryo, nwanani a Kristu uwo oneetta n'ikhavalo vasulu va Ikanyeryo iyo. Daniyeli aahihimya yeeyo va, "Mukhulupale aarowa orwa." Owo aamurowa wiiviwa, Yesu aamurowa, wira aalevelele atthu. Masi, "Mukhulupal'owo aarowa ovenya, aarowa okolomoliha yootakhala yuulupale yoowuuliha muru," owo aari Rooma, mwa Titu. Nto okathi ula, owo ti mukhulupale onikhuma oRooma, onrowa wira. Nto owo onoosuwelihiwa nihiku nookiserya,

vano nwiriyane, “aikhalihaka Muluku,” ntoko Eroho Yowarya ennipol’aya mwa aTesalonika Aneili, 2.

Nrowe nikhunle vaavo aTesalonika Aneili, vano nto khamunrowa okhalana masu aka masi Masu a Muluku. aTesalonika Aneili, kapiitulu 2 versiikulu 12. Nrowe noone. aTesalonika Aneili, kapiitulu 2 versiikulu 12. Nrowe noone. Nrowe nipacerye vasulu vaya yeeyo, versiikulu 7.

Okhala wira owerya wootakhala onivira ovaraka muteko aya: . . .

(Ola ti Paulo onlavula, ni Eroho Yowarya.) . . .

paahi—paahi ole onimukhottiherya, mpakha owo okumihwa-vo eriyar’iyo.

T’ani “Owo” va? Ookhala onimusuwela? Eroho Yowarya, “Ole onimukhottiherya.”

Okathi uwo (liini) onimoonihariwa Mutakhali uwo, . . .

Liini? Okathi ene yoowo Eroho Yowarya enikumihwaaya, yeeyo ehanle okhuma naanaano va. Eyo enikhumela-ni? Okuxa Ekereja ni Yeeyo. “Ehuupululiwa!” Paulo alavulaka, vathi va muupuxeryo.

. . .yoowo Apwiya anrowaaya omupwetexa n’iphumu sa mwaano mwaya, anommalihani nittittimiho na orwa waya: (mutakhali, vekeekhai)

Nave yoowo, orwa wawe ontthariheliwa ni ikuru sa Satana n’uverya ni ithoonyeryo ni sootikiniha soowootha,

“Hiyo na ekereja yoomalela wunnuwa. Hiyo nookhalana *ela*. Hiyo nookhalana *ela*. Nyuwo othene mwiiraane,” moone. “Hiyo ti nimalenle wunnuwa.” Sootikiniha soowootha!

Ni sothene . . .sa sootakhala w’ale ampweteya; okhala wira aakhootta waakhela ophenta w’ekeekahi, wira yoopoliwe.

Nto mwaha wa yeeyo Muluku ohaaveleliha wootha wuulupale, wira yaamini itthu soowoothiwa yaamini itthu soowoothiwa:

Ni wira awo . . .wira elamuliwe ale ahaaminni ekeekhai, nto ansiveliwa itthu sootakhala.

¹¹⁴ Munniiwa saana? Oh, wulu! Vano Paulo alavulaka. Okathi Ekanyeryo ya Muluku ensuwelihiwaaya, Eroho Awe, Nsina Nawe, mahala Awe, isiiri sothene sikina suulupale sinkhumela vano, itthokiheryo sa Ekereja Awe orowa Okuxiwa; omwaraxiwa wa Eroho Yowarya ehiira yeela. Ti yeeyo Eyo eniir’aya mahiku ookiserya.

¹¹⁵ Vano, nrowe noone. Nookhalana okathi wa yeela yookiserya? [Muthukumano oniira, “Amen.”—Mol.] Yaneethanu na mosa,

“Ottikittheliwa ole Oowaarexa.” Oh, wulu! Ela eri va! Etthu yookiserya Eyo enrowaaya wira, ti exeeni? Vano, nrowe nitthikele mwa Daniyeli, noone sothene Owo onrowaawe wira vaava va. “Isumana miloko mithanu na miili.” Exeeni enrowa omaliheriwa okathi ula? Vaareera.

...sookumiheriwa wa atthu anyu ni...muttetthe anyu woowaarya, wira simalihiwe sootakhala (sootakhala s’atthu), ...wira emalihiwe etampi (wa atthu), ni wira sileveleliwe soottheka saya, ni wira elipihawe exariya voohimala-tho (wa aYuta), ni wira omaliheriwe wooniheriwa ni moolumo eeprofeta (mpakha okathi wookiserya), ni ottikittheliwa ole Oowaarexa.

Iyo ti itthunelo thanu na mosa sa orwa Wawe.

¹¹⁶ Vano, “ottikittheliwa ole Oowaarexa.” Vano, ela pooti okhala yootikiniha vakhani okathi vakhani, w’anci-ene a nyuwo alipaoosomiha, masi vano nvarelele paahi minuutu mmosa, moone paahi moota enikhumel’aya.

¹¹⁷ Ola ti muttikitthelo, kahi wa mutthu. Yesu oomala ottikittheliwa. Ekeekhai? Eliivuru ya Miteko ehimnye wira Muluku aahimuttikitthela Yesu ni Eroho Yowarya; Owo aarowa mapuro othene airaka sooreera, aavonihaka aretta, ni sikina. Yesu oomala, okhala. Owo ti Mesiya. Ni *Mesiya* enihimya “Ole oottikittheliwa.” Eyo ekeekhai? Masi va okathi wookiserya, Owo ori wira amuttikitthele ole Oowaarexa.

¹¹⁸ T’ani okhanle “Oowaarexa”? Mwa enamun’aka yo woona, yeeyo kinikupaly’aka wira kinoowerya wooniherya ni Soolempwa, ti omuttikitthela “ole Oowaarexa,” enrowa okhala Empa enrowa orumeeliwa okathi wa Mileeniyu. Vano nwiriyane, moone mwaha wa xeeni eniphivery’aka yeeyo. Yoohimmwa mwa Ezekiyeli, ka—kapiitulu 4, e. . .Nnari, kinihimya kapiitulu 43, versiikulu 1 ni 6. Nrowe nitthikele mwa Ezekiyeli noone moota owo onoon’awe oMileeniyu, moota anrowaaya omuttikitthela e. . . Ezekiyeli 43, nrowe nisome vakhani paahi vano noone etthu Owo onrowaawe wira oMileeniyu nno, ottikitthela. Ezekiyeli 43, vaareera, nto vano nrowe nipacerye 1, mpakha versiikulu 6. Pooti osoma etthu yothene mwaphiya owaani, vekeekhai, nyuwo munlepa, Ezekiyeli 43. “Vano. . .”

¹¹⁹ Vano, nwehe, ohimmwa wa Empa enrowa otekiwa oMileeniyu. Vano, mutthu ti mutthu, khula musomi onsuwela, wira okhuma Ezekiyeli kapiitulu 40, mpakha kapiitulu 44, kehiyo hat’etthu woohikhala Empa y’oMileeniyu entekiwa elapo ya vathi, (khula mutthu onnisuwela eyo, moone), okathi ovuwa w’Apwiya onsary’aya yeeyo, ni sikina siiso. Vano hiyo. . .ninrowa ohimya paahi Empa muhina mwa kapiitulu 43, versiikulu 1 mpakha 6.

Vano owo aahikirowana mukhora, mukhora oniweha onikhuma nsuwa:

Nto, kaahoona, ovuwa wa...Muluku a Isarayeli orwaaka onikhuma nsuwa: ni oruma waya waalikana n'uruma wa maasi manci-ene: etthaya yaanaarya mwaha w'ovuwa.

Ni waari woolikana ni yoowoona koonalyaka, waalikana ni yoowoona koonalyaka okathi waarwiiyaaka ohonona muttethe: ni yoowoona eyo yaalikana ni weuwe woonalyaka okerekhere wa muro Kebari; vano miyo kaahimora kiipopheya vathi.

Vano ovuwa w'APWIYA—ovuwa w'APWIYA waahikela mpaani oviraka mukhora oniweha onikhuma nsuwa.

Siiso erooho yaahikikuxa, khukikeliha niyate na muhina; nto, kaahoona, ovuwa w'APWIYA waasareiyi mpaani.

Vano kaahimwiiwa alavulaka ni miyo okhuma mpaani; nto mulopwan'owo aaheemela vakhiviru ni miyo.

¹²⁰ Ottikitthela, ottikitthela Empa eyo y'omwene wa Mileeniyu. Vano nwehe mwa Onamukuttho. Vano nwehe moota yaavahereriwaaya mwa Onamukuttho. Vano, natthikela mwa Onamukuttho, ninnisuwela wira Moise aahittikitthela empa y'olompa. Nrowe nitthike paahi niry'ene vaavo. Nookhalana okathi oniphiyerya. Nto nrowe nitthikele Onamukuttho nisuwele okathi Moise aattikitthenly'awe empa y'okokhorela, mwa Onamukuttho kapiitulu 8.

¹²¹ Oh, okisivela olikanyiha Soolempwa ni Soolempwa. Khenoosivelani? Vano nto nyuwo—nyuwo muhaana mu—mu—muupuwelo wa etthu—wa etthu enaavyaahu ni etthu eniir'ahu. Vano, khula mmosa a nyuwo onnisuwela wira ninrumeela Yoolempwa emosa okathi p'ukathi, wa yeeyo.

¹²² Vano, kapiitulu 8 ya Onamukuttho, ni kookhalana yookwerethiwa va, versiikulu 10. Nwehe Onamukuttho 8:10. Nrowe noone.

Numala Moise aahikuxa makhura oottikitthela, aahimwaraxela makhura oottikitthela, aahoottiha empa ya muhina n'itthu sothene saarin'aya, khureeriha.

Ni...aahaatathela altaari imaara thanu na piili, ... aahiwoottiha altaari n'itthu sothene, siiso-tho ekamela ni neemexeryo naya, wira e...areerihe.

Ni owo aahimwaraxela...makhura oottikitthela vamuru v'Aroni, vano aahimooottiha, wira amureerihe.

¹²³ Moise, mothakoni, areerihaka, ahiiso attikitthelaka empa y'okokhorela, w'ana a Isarayeli okathi yaary'aya mmukwahani mwaya. Yaahittikittheliwa makhura.

¹²⁴ Vano, mwa Wahala Aneili, mukhunle vaavo, nnimoona ovahereriwa wira okathi Eroho Yowarya yaakuxaly'aya opuro Aya mpaani m'okokhorela, nwehe etthu yiiraneieyo vano. Mwa Wahala Aneili kapiitulu 5, nrowe nipacerye versiikulu 13. Wahala Aneili kapiitulu 5, nipacerye versiikulu 13.

Nto *yaahiraneya...okathi, malope ni alipa-
oowiipa yaaryaya...erumihaka nsu nimosa...
yaahaattotopela ni waavuwiha APWIYA; siiso okathi
yilipih'aya masu aya ni malope ni xittaatta ni ikaruma
sa isipo, yaattotopelaka APWIYA, yiipaka wira, Maana
awo t'oreera murima; ni omoriwa waya ikharari ti
woohimala: nto empa yaahisarya neeku, empa y'APWIYA;*

*Siiso alipa a mukuttho yaakhala...alipa a mukuttho
khayaawerya okhala-mo wira evareke miteko
s'onamukuttho mwaha wa neeku: okhala wira ovuwa
w'APWIYA waahisarya mpaani mwa Muluku.*

¹²⁵ Muluku aahikela empa yaarowa ottikitheliwa, ni aavahereriwaawe Yoowo wira atthu erweeke okokhorela. Vano, omuttikithela, kahi nipuro "nanyu noowaarya", masi ottikithela nipuro "Noowaarexa." Nto hiyo ninniweha, wira, oYerusalemu wa Naanaano ti nipuro "Noowaarexa." Ottikitheliwa onrowa okhala vasulu va oYerusalemu wa Naanaano onikhuruwa okhuma wa Muluku Wirimu, otthokihewe ntoko muthiyana oophapiwa onwarende iy'awe. Ottikitheliwa onrowa okhala mwa yaawo.

¹²⁶ Vano, okathi Zoropapeli ovaherenry'awe emp'awe y'okokhorela, vaamanly'aya otekiwa-tho, khiyaattikitheliwe-tho, okhala wira yiira ettikitheliweene; ni yaaroopwexakasiwa, nto yaarowa otekiwa-tho paahi. Opwexiwa waakhumelenle yeeyo. Yaahitthikela-tho otekiwa khweemexiwa, tivo khayaarina-tho ottikitheliwa. Ery'ene yoottikitheliwa emaara emosa, eyo yaahipwaha, ni enookelela ohoolo mpakha okathi ene yoola. Masi okathi Muluku onikhalihaawe Empa y'oMileeniyu, Owo onrowa omuttikithela ole Oowaarexa; kahi "oowaarya anyu," masi "ole Oowaarexa."

¹²⁷ Masi okathi Mwene onikuxaawe Ehice Awe iyaakha ekonto emosa, (Ovuwa!) eyo yoomalamala vano. Ottikitheliwa ole Oowaarexa enrowa okhala etthu yookiserya eniiraneya. Okathi Empa entekiwaaya; ohihimuwa oniira orwiyeene; aYuta aniira etthinkeene; Kristu ni Mwaakameliwa Awe arwiyeene; aYuta, ikonto miloko muloko ni miloko mixexe n'atthu ikonto xexe aathittiwa ekanyeryo; Mileeniyu ehiiraneya. Onookhala ottikitheliwa okathi nipuro Noowaarexa ninrowaaya ottikitheliwa; oowaarya, nipuro Noowaarexa, ni ole Oowaarexa. Okathi, nipuro Noowaarexa ti empa eyo Muluku aakhalak'awe, eriyari ya maKerupi. Nto, okathi ula, Kristu onrowa okilaathi nipuro Noowaarexa, ni ottikitheliwa

ory'ene mwa Yoowo. Vano awo khanrowa otthuna nsuwa iwe, maana Mwaapwittipwitthi eriyari ya Muttetthe onrowa okhala Muthuko ene. Nsuwa khaninrowa otupweela Muttetth'ole, ntoko aahimyak'awe Taata Jim mutokweene. Ni khaninrowa otupweela, okhala wira Kristu onrowa okhala Muthuko yoowo, Ole oottikittheliwa. Vano Mwene onimoorwa akuxe Ehice Awe iyaakha ekonto emosa, wira eettihe omwene.

¹²⁸ Yeremiya 3:12-18, nave-tho, nrowe nisome. Mwa Yeremiya kapiitulu 18, kookupali. Ayo. Nnari, kapiitulu 12, kileveleliwe, kapiitulu 12 ya Yeremiya, nrowe nipacerya e...Yeremiya 3, kileveleliwe. Yeremiya 3, koole—koolepa va, vaavo, kisomaka, Eroho Yowarya yaanikikuxa nipuro mpakha nipuro, miyo khulepa iya vooreerexa ntoko saawery'aka. Yeremiya 3, vano 12 mpakha 18, nave. Nrowe nisome.

Murowe vano epantte enikela epheyo, mwakhuwelele moolumo ala, wira, Mutthike, nyuwo alipa-oohiiwelela a Isarayeli, anihimya t'APWIYA; nto nkinrowa wooruuhelani ovi—ovi...wooruuhelani oviruwa waka: maana miyo k'omoriwa ikharari, anihimya t'APWIYA, ni nkinooviruwelani mahiku othene.

Mwiisuwelihe paahi ottheka wanyu, woona muhaarukunuwela APWIYA Muluku anyu, ni mooraruwa mwaakokhorelaka amuluku a amalapo vathi va miri sothene,...

Ti yeeyo awo yiiraly'aya, okhuma onikhuma nsuwa, onkela nsuwa, khula elapo. Munnona?

...nto nyuwo khanwiriyanne moolumo, moolumo aka, anihimya t'APWIYA.

“Mutthike!” Nwiriyane ela.

Mutthike, O alipa-oohiiwelela, aana, anihimya t'APWIYA; maana Miyo ka (k-i-h-o-o-t-h)...Miyo kihoothelani nyuwo:...

“Maitho aya yaahikhalihwiwa oohoona, okhala wira Miyo kinaavaha okathi Amalapo. Masi, nyuwo mutthike, maana Miyo kihoothelani nyuwo.”

...nto Miyo kinimoottotelani mmosa wa khula muttetthe, ni aili wa khula etthoko,...

Kahi othene aniisiihana aYuta anookela. Masi nikhuru nle noothanliwa ti ninrowa okela, Peniyamini ule mwaamukhaani orwiye iwe ohoolo wa Yosefe, nikhuru nle ninkhuma khula elapo, mmosa a wa khula muttetthe, ni wa khula etthoko.

...nto kinimooruuhani oSiyoni:

Ni kinimoovahani makampusi kittharihaka murim'anyu, yaawo antthuna oweettihani n'ankhili n'ucaliha.

Vano vanimwiiraneya, mwancerereya voowaatta mulaponi, mahiku awo, anihimya t'APWIYA, khunrowa-tho okohiwa wira, Ni—nivuku no waataana n'APWIYA: khaninrowa-tho wuupuweliwa: khaninrowa-tho owunkhelani; khaninrowa-tho otho—othotoliwa; khaninrowa-tho opakiwa nikina.

mahiku ene yaawo Yerusalemu onimwiihaniwa ehice y'APWIYA; (okhala wira Awo anrowa okhala weiwo, moone), ni maloko othene anrowa othukumana (aleluya) weiwo, ni nsina n'APWIYA, oYerusalemu: nnakhala khanrowa weetta ettharaka miyuupuwelo saya mwa sootakhala sa mmurimani mwaya.

¹²⁹ Owo p'ukathi Muttetth'ole onrowaaya ottikittheliwa. Owo p'ukathi oYerusalemu wa Naanaano onrowaaya ottikittheliwa. Nto maloko othene a Muttetthe . . . Mwa Wiisuupulula kapiitulu 22, ehimmwe wira mikhora khansirowa owaliwa ohiyu, 'okhala wira khunrowa-tho okhala ohiyu iwo. Ni mamwene othene a mulaponi anrowa oruha nttittimiho aya ni ovuwa Muttetthe yoola. Ixiri saya sinrowa okhala sa maluku a yaspe ni sartonia, mithinto muloko ni miili sa maluku; ni mikhora muloko ni miili nluku nimoso noowaarya noolipa, nimoso khula mukhora. Khivanrowa otthunaneya muthuko memmo. Khunrowa-tho okhala waarya wa nsuwa, maana Mwaapwittipwitthi ori eriyari ya Muttetthe t'unrowa okhala Muthuko. Vano Owo onooweettiha athu Awe mpakha mw'Ekumini ehinimala. Sinookhala miri miili, mmosa wa khula epantte ya muro, vano iyo ti sa ovonihiwa w'athu a mulaponi. Owo ti Yoole oottikittheliwa onrowa orwa, Muttetthe Woowaarya onikhuruwa okhuma wa Muluku Wirimu, onrwa mulaponi.

¹³⁰ Nrowe nikuxe vano ele enrowa wiiraneya okathi ene yoowo. Oh, ennoosivelani yeeyo? Nrowe nimukhunle Yesaya 65, okathi vakhani paahi. Eyo khereere oreera voohivireya vasulu. Khereere oreera wira nihiye. Pooti wira ovihaka vakhani, masi nrowe nitthikele nirowaka ohoolo paahi.

¹³¹ Yesaya 65, nwiriyane ele enrowa wiiraneya okathi ene yoowo. Nto mwiikohe mmansinyu, mpatthani natampi, vakhala wi nyuwo—vakhala wi waamoosivelani ohaleela yeela. Yesaya 65, nrowe nipacerye ntoko versiikulu 17. Nwiriyane, athu othene, oratteene vano. Ola p'ukathi wa Mileeniyu, okathi ole Oowaarexa ontikittheliwaawe.

Tthiri, musuweleke, Miyo kinrowa opattuxa irimu isya ni . . . n'ilapo esya: nto itthu sa khalayi khasinuupuweliwa-tho, nnakhala otthokeleliwa.

Masi muno . . . otteeliwa murima n'utthapa . . . mwaha wa itthu Miyo sipattuxaly'aka: tthiri, moone, Miyo kinipattuxa oYerusalemu . . . Miyo kinipattuxa

oYerusalemu, (owo ti Yerusalemu a Naanaano), otthapa, ni atthu aya otthapa.

Ottikittheliwa exeeni? Otthapa w'Apwiya.

. . . kinipattuxerya oYerusalemu otthapa, ni atthu aya otthapa. Ni Miyo kinootthapa oYerusalemu, . . .

Mwene Veehiceni, moomweneni muulupale wa Veehiceni, Ehice ya Mahiku othene, ni atthu a Mahiku othene ni otthapa Ohinimala Mmuttettheni Ohinimala! Oh, wulu!

Ni Miyo kinootteeliwa murima oYerusalemu, n'utthapa mwaha w'atthu aka: ni khoniwanyeya-tho wunla mwa yoowo, nnakhala nsu na ikuttho.

Weiwo khanikhala-tho . . . mwanamwane a mahiku vakhani, nnakhala oowuuluwala oohimaleliha mahiku awe: maana mwaana onrowa okhwa onarina iyaakha miloko muloko; masi natampi a iyaakha miloko muloko nootakhaliwa.

Vano awo anooteka ipa, ekhaleke memmo; . . . anrowa ophattheya miri s'eviteera, awo elyeeke mihokorokho saya.

Khanrowa oteka ipa saya, vano akina enakhala-mo; (eyo ti wii, nyuwo okhwa vano mwan'inyu onakuxa opuro anyu) . . . oteka, vano mukina onakhala-mo; khanrowa ophattheya miri saya, vano akina enalya mihokorokho sene: maana ntoko mahiku a miri anoorowa okhala mahiku a atthu aka, oothanliwa aka mahiku manci-ene anoopuha iye sivarenlyaya miteko.

Awo khanvara-tho muteko mahala, khanaayara-tho an'aya wira etakhaliwe; maana awo anookhala nloko nooreerihwa n'APWIYA, ni osuulu aya ni yaawo.

Vano enimwiiraneya, . . . awo ehinatthi okiihana, Miyo kinoowaakhula; . . . (Muttikitthelo owo woovuwa, ottuli wa Kerupi!) . . . Miyo kinoowaakhula; ni nlelo alavulaka, Miyo kinoowiwelela.

Mwiici ni mwaapwittipwitthi animooyaka vamosa, . . . kharamu onrowa olyaaka malaxi ntoko enyompe: etthaya enrowa okhala yolya yenowa. Ni awo khanrowa opuheryana nnakhala opwetexana vamwaako vaka vothene voowaarya, anihimya t'APWIYA. (Mookhala ohaleela? Nnari!)

¹³² Mutuphele-tho va, Yesaya alavulaka-tho, kapiitulu 11, versiikulu 1 mpakha 9. Nwiriyanne etthu enihimy'awe-tho va, okathi oniphwanyaawe yoowoona, numala owoona athiyana, moota anrowaaya wiiraka mahiku ookiserya. Ni-. . . Ahe, Yesaya, 11, 1.

Enoophuwa eritta veexaani va Yese, . . . Eritta enrowa okhuma mmitathaarini mwaya: (Aari pani uwo? Kristu). . . okhuma mmitathaarini mwawe:

Vano Eroho y'APWIYA enookhala mwa yoowo, erooho y'osuwela, ya ankhili, erooho ya miruku. . . ikuru, erooho y'osuwela ni. . . yo waattittimiha APWIYA;

Ni enoolipihiwa mwaha w'owoova APWIYA: ni yoowo khonaalamula athu ntoko sinoonaawe maitho awe, nakhala. . . ntoko wiwa wa maaru awe:

Masi onoowiirela exariya amasikhini, onoowaakiha n'ikeekhai alipa-oowiimaaliha a mulaponi: ni moolumo awe onoohukhamu elapo, n'iphumu sa mwaaano mwawe onimwaapwetexa ale ootakhala murima.

Exariya enrowa okhala musako muyuununi, ni romeleya musako wa mw'esyoni mwawe.

Vano mwiici nave onookhala vamosa ni mwaapwittipwitthi, nto havara onimummaathiki vamosa ni mwapuri (eyo ti epuri); mwaanyompe ni mwakharamu ni animoolyaka malaxi. . . ahiiso mwaanyompe, wala kharamu animoolyaka malaxi vamosa; mwanamwane onrowa oweettihaka.

. . . enyompe ni ekhaya animoolyaka; . . . axaan'aya (ni) anoorpaka nipuro nimosa: kharamu animoolyaka malaxi ntoko enyompe.

Mwaana a mmatatani onoothweela vamwiitheni v'enowa, mwanamwane onookeliha ntata mmwiitheni mw'evili.

Khiniireya-tho yoonanara vamwaako vaka voowaarya: tthiri elapo enoosareya osuwela. . . ntoko maasi vansarey'aya mphareya.

Hum! Eyo ti oYerusalemu weiwo wa Naanaano. Yoole "musya." Yoophuwa, va, enihimmwa, Yoophuwa ya Davidi. "Owo ti soopiili Yoophuwa ni Osuulu."

¹³³ Vano, numala yeela, Mwaakameliwa onookhumela. Nuuvira isumana miloko mithanu na miili, Mwaakameliwa onikhumelela mwa Wiisuupulula kapiitulu 19, versiikulu 1 ni 16. Owo onoorwa ni Mutheli Awe, Mwene oowerya. Oh, wulu! Nkisuwenle nkhamana ninoorowa okuxa yothene eyo wala nnari. Kookhalana siiso . . .

Ahe, nrowe nisome paahi epantte ya yeela, khula enamuna. Va ti nipuro Mwaakameliwa onrowaawe orwa, nuuvira yeela. Munnona? Vanimal'aya Mileeniyu okela, vano Kristu onoothika ni Mwaakameliwa. Khweeli, 1 mpakha 16, ni kapiitulu 19.

Nto numala itthu iya. . .

Numala Ohaawa nno; numala Otakhaliwa; numala Ikanyeryo; numala Ihasara; numala oriheliwa Satana; numala okhalihwa eMileenyu. Nwehe!

...numala itthu iya miyo kaahiiwa n...nsu na muttitthi muulupale wirimu, niiraka, Aleluya; Woopowa, ni ovuwa, ...nttittimiho, ...owerya, ti w'Apwiya Muluku ahu:

Tthiri ekeekhai n'ixariya ti olamula wanyu: tthiri owo oomuhukhumu muthiyan'owo namararuwa muulupale, yoowo aahonona elapo mwaha wa sooraruwa save, ni oomunlela ikuhu mwaha w'ephome y'arumeyi awe mmatatani mu'awe.

Vano emaara ekina owo...awo... Vano awo yaahiira-tho, Aleluya. Nto mwiixi aya onniwela mahiku othene.

Eyo ti ekereja ya khalayi namararuwa, "mwiixi aya waahiwela."

Vano mahumu miloko miili ni maxexe n'akumi awo axexe yaahuurama mpakha vathi khumukokhorela Muluku yaakilanthe veehicensi, yiiraka, Amen; Aleluya.

Vano naahiiwanyeya nsu nikhumaka veehicensi, niiraka, Mmuttotopele Muluku ahu—Mmuttotopele Muluku ahu, nyuwo arumeyi awe othene, ni nyuwo munimoova, aalupale n'akhaani.

Numala kaahiiwa nsu naalikana n'unyakula wa muttitthi, ...

Nwiriyane! Ela eri va, Ekereja. Numala Eyo owela kapiitulu 3, va Eyo enimoorwa. Munnona? Nto vano versiikulu 6.

Numala kaahiiwa nsu naalikana n'unyakula wa muttitthi muulupale, ni ntoko oruma wa maasi manci-ene, ni ntoko nsu n'okukutteya, niiraka, Aleluya: tthiri Pwiya Muluku oowerya sothene ooheliwa omwene.

Aleluya! Nwehe! Othela wa Mwaapwittipwitthi onoorwa vano. Eyo enoorwa va.

Nitteeliweke murima n'utthapa, nimuttittimiheke yoowo: maana woophiya okathi wa niira n'othela wa Mwaapwittipwitthi, nto mwaar'awe ohilokiherya. (Eyo enoorwa va, oowaili, Mwaakameliwa ni Mutheli.)

Owo aahivahiwa owara ekuwo yootteethya, yoowaarya ni yootteela: maana otteethya enthoonyerya...exariya y'atthu oowaarya.

Vano owo aahikihimeerya wira, Mulepeke, Ooreeriwa t'ale yitthaneliwe yoolya ya niira n'othela wa Mwaapwittipwitthi. Ni owo aahikihimeerya wira, Ala ti...masu a Muluku ekeekhai.

Nto miyo kaahuuramela inawu wira kimukokhorele yoowo. Nto owo aahikiirela, Muhiire siiso: Miyo ki murumeyi ntoko nyuwo, . . . axinn'inyu ni kihaana . . . axinn'inyu ankhapelela onamoona wa Yesu: mmukokhoreleke Muluku: vekeekhai onamoona (wa Kristu) wa Yesu t'irooho y'oprofeta.

Numala kaahoonu erimu ehuleiyeene, nto . . . ekhavalu yootteela; . . . (oh wulu!) . . . vano ole okilantho-vo . . . iihaniwa Ororomela n'Ikeekhai, ni . . . onnilamula ni onniwana ekhotto n'ixariya.

Vano maitho awe yaari ntoko malumi a mooro, ni . . . mmuruni mwawe aahiwara ikhara sinci-ene; . . .

Owo aawarihiwe ikhara ntoko exeeni? “Mwene a mamwene.”

. . . nto owo aahilempwa nsina, nihinsuweliwa ni mutthu, masi . . . yoowo paahi.

Ni aahiwara nlaya nootteela noonaanihiwa n'iphome: nsina nawe oniihaniwa Nsu na Muluku.

“Wopaceryani naari Nsu, nto Nsu naari Muluku. Vano Nsu nihiipaka erutthu khukhala ni hiyo.” Aari pani Uwo? Yesu.

. . . nto nsina nawe oniihaniwa Nsu na Muluku.

Mittitthi s'anakhotto a wirimu saanimutthara yoowo seettihaka ikhavalu sootteela, swanreene ikuwo sootteethaya, sootteela ni sooreera. (Ovuwa! Eyo enoorwa va.)

Mwaano mwawe waanikhuma mwaalo woowiitha, . . . ni owo onrowa waavulaliha amalapo: ni . . . onrowa oweettiha athu n'ikopo ya yuuma: onrowa owama eviinyu mweehimeni y'onanariwa wa Muluku Oowerya sothene.

Ni vanlayani vawe ni vamwettoni vawe vaalempwa wira, MWENE A MAMWENE, NI PWIYA A MAPWIYA.

¹³⁴ Yaari exeeni iyo? Athu awe yammalaru omuwariha ekhara Mwene a mamwene, ni Pwiya a mapwiya. Aththikelaka-tho Mpaani mw'Awe moowaarya, ootthikittheliwa ni Mukhalelo wa Muluku, wira akhaleke ni eettiheke omwene okathi wa Mileeniyu ni Ekereja Awe. Amen! Ekhumelero, ni Mwene oowerya, wira ekuxe opuro Aya epantte Awe, Empa esya yootthikittheliwa y'omwene.

¹³⁵ Vano sootthuneya thanu na mosa sa Wiisuupulula 6:1 mpakha Wiisuupulula 19:21 soomaliheriwa.

¹³⁶ Nwiriyaano vano, nimalihaka. Ikanyeryo Thanu na piili, Malope Mathanu na maili, Mihasa Mithanu na miili, Ihasara Thanu na piili, muthiyana vansuwani, oriheliwa wa xetwani, ahiiso ehanasi yooweerya, sinrwa eriyari ya okathi ula wa

okathi w'Ohaawa wuulupale. Muhiliyale eyo. Itthu iya sothene siniiraneya okathi yoola.

Masi va siri sootthuneya thanu na mosa sa Orwa Wawe. Munnaamini yeeyo? Okathi xeeni woovuwa asukeliwe ale anaaphenta Apwiya! Kinimooleelani, mpatthani, muhiire ohaleela yeeyo. Muhihaleele, wa sothene siniir'anyu. Mukupali!

¹³⁷ Vano, Ettiminku enrwa, Apwiya yatthuna vale, kintthuna kooniherye, Awo yakikhaliherya vale, wooniherya oratteene nipuro khula nimoso wa mahiku ale mathanu na maili, otthu yiiraneiyeye aya, kiruuhaka yeela—etthu ene yeela kiruuhaly'aka olelo, ni okhaliha okathi uwo mithanu na miili, isumana thanu na piili, isumana miloko mithanu na miili oratteene vooপুরoni va emp'ele y'okokhorela y'aYuta, ni wooniherya oratteene vatthu vankhal'ahu va wookiseryani, Apwiya yatthuna vale.

¹³⁸ Nyuwo munnimphenta Owo? [Muthukumano oniira, "Amen."—Mol.] Munooaphavela ohaleela Erimu? ["Nnari."] Hiyo niri okathi wookiserya!

Owo onrweela wira exeeni? Etthu yoopacerya enrowa okhumelela, Yesu ahinatthi orwa elapo ya vathi, t'ivi enrowa okhala etthu yoopacerya? Ekereja enrowa okhala (exeeni?) okuxiwa! Yesu onimoorwa mulaponi eettakase vamahiye, avahane matata n'atiithi n'amaama, alavule ni hiyo othene va, nto awele? Nnari!

Enrowa okhala sayi? E. . . Hiyo ninoohimeeryani ila nyuwo, ni ma—ni Masu a Apwiya, "Wira niri akumi ni ninkhala. . ." aTesalonika Aneili, kapiitulu 5, "Hiyo ninrowa ohala nry'ene akumi nihiku Ninrw'aya Apwiya, khaninrowa waakhottiha ahiiso waaholela ale anrupa. Okhala wira nlope na Muluku ninooruma; ale akhwiye mwa Kristu t'anrowa opacerya ohihimuwa: numala hiyo ninrowa ohala nry'ene akumi ninrowa okuxiwa vamosa n'awo nrowaka okumana n'Apwiya osulu." Ninrowa okuxiwa naanaanoru, waaphila wa niitho. Okathi ene yoowo, onimal'aya Okathi wa Ekereja.

¹³⁹ Numala, vathi va Muluku onipacerya ovara muteko n'aYuta. Anookhala maprofeta maili. Kapiitulu 11, ninimoona yeeyo. Maprofeta maili oottikittheliwa, ntoko Eliya ni Moise, kinoon'aka wira ti yaawo. Vano awo anooruha otakhaliha wuulupale, vanimal'aya wona wira aalipa, ni Rooma oohonona waataana waya, mukhulupal'ole.

Variyari va esuman'ela yanamiloko mithanu na miili, onrowa ohonona waataana waya ni Rooma, ahiiso Rooma onrowa ohonona ni Isarayeli, vano eyo enookolomoliha otakhala woowuuliha muru opacerya omwaramwareya. Ni onookhala osarya maasi, okathi osuulu waahanle w'Amalapo, mwali harusi aarumpe. . . Ehanasi, Rooma, aarapheyaly'awe maasi mwaano mwawe, wira apake ekhotto ni osuulu wa muthiyana waahanle oneetela sooruma sa Muluku. Rooma onimwiira yeeyo.

¹⁴⁰ Mwaataano wa ekereja onimwaalipiha vamosa, ni waaruuhe aYuta muhina mwa mwaataano yoola, ni onimwaahokoloxerya-tho okokhorela waya wa mpaani m'okokhorela, mwa SIISO ANIHIMYA T'APWIYA a Bibilia, nto awo anookhalana ekereja aya yawaya.

¹⁴¹ Awo exeeni vano? Miyo kinoomalaru ophwanya naanaano. Eyo esya. Awo nloko vano, noosuveliwa. Eyo ekeekhaii? Masi awo khanatthi okhalana okokhorela waya wa mpaani m'okokhorela nlelo. Vano awo yakhaliharu okokhorela wa mpaani m'okokhorela, Ekereja eniira eronweene. Muluku onrowa ovaraka muteko n'aYuta ntoko nimoso. Vano nto awo yakelihiwa-ru mmwaataanoni mu, Rooma onoothonona variyari va eyaakha yanamiloko mithanu na miili, iyaakha tthaaru ni nuusu, owo onoothonona waataana iwo n'awo, akolomole yootakhala yoowuuliha muru enimwareela mpakha woomalelani. Vano onrowa waakuxa oowaili maPrustante, n'aYuta, aalupattheke. Okathi uwo, maprofeta ala maili anoovenya etakhalihe elapo, wira memmo ehirupe epula mahiku a oprofeta aya. Vano awo animwiihana Mooro okhuma Wirimu, n'itthu sothene sikina. Mulipelele paahi. Nookhalana sinci-ene sipwehiwe va, sisukeliwaahu, wira niixutte.

¹⁴² Oh, Muluku muulupale xeeni Owo okhanly'awe! Tithi xeeni oomoriwa ikharari! Apatthani, mukihye kihimye ela, ntoko pastore anyu. Nyuwo khamunsuwela oreeriwa munkhal'anyu vathi vaya. Khamunsuwela. Aakhala atthu anci-ene aalupale, aakhala atthu oowaarya anci-ene, aakhala atthu oowaarya ikonto sene akhwiye iyaakha sivinre, atthu oosareya Eroho yaarowa ophenta wona nihiku nla nyuwo munkhal'anyu. Nrowe nyuwo ni miyo nittottele muraarelo na nenla.

¹⁴³ Exeeni-tho erin'ahu olipelela? Nikhanle wiiraka exeeni numala yeela? Ninrowa woowi? Exeeni enrowa wiiraneya? Nihaana orowa nipuro nlo. Khamukhanle okhala muumu okathi wothene. Munooverya othikila malaxi anyu; esumana enrwa anthuna othikiliwa-tho; ayo, vaara vaili, okathi uwo ohinatthi. Munooverya waalela an'inyu. Munimwaavaha yolya y'othana; okathi wa yolya y'ohiyu anoovoliwa-tho. Waalyiha ohiyu; anoovoliwa-tho voosiisu aya. Munimwaathumela ixapattho; sakhala ntoko sawaka, miyeeri soophiyaka miili wala miraru munimwaathumela sikina. Munimwaathumela ikuwo mweeri ula; mweeri mmosa wala miili munaathumela ikuwo isya. Munnona? Khiivo entthikela erowaka ohoolo. Khiivo etthu yoolipalipa. Khiivo etthu enwerya okhala mahiku othene.

Muhinleleke mihakhu s'ethiru sa
 molumwenkuni mu,
 Sinhononeya naanaanoru,
 Mukhalihe miroromelo sanyu mwa itthu
 Sihinimala,
 Iyo khasinrowa ovira!

Okathi ti wowaakuva olakaseya,
 Khiivo etthu mulaponi enrowa ohala,
 Mukhalihe miroromelo sanyu mwa itthu
 Sihinimala,
 Nvarelele ntata na Muluku nihinrukunuwa!
 Nvarelele ntata na Muluku nihinrukunuwa!
 Nvarelele ntata na Muluku nihinrukunuwa!
 Mukhalihe miroromelo sanyu mwa itthu
 Sihinimala,
 Nvarelele ntata na Muluku nihinrukunuwa!

Nwiriyane:

Mukwaha ahu wamalela vale, (Owo
 onoonisuweliha wamala vale.)
 Nakhala ooromeleya wa Muluku,
 Nipuro nooreera ni noowaarya owaani
 Moovuwani, (Muttetth'ole woottikittheliwa.)
 Munepa ahu wookuxiwa onimoona!
 Nvarelele ntata na Muluku nihinrukunuwa!
 Nvarelele ntata na Muluku nihinrukunuwa!
 Mukhalihe miroromelo sanyu mwa itthu
 Sihinimala,
 Nvarelele ntata na Muluku nihinrukunuwa!
 Muhinlele mihakhu s'ethiru sa molumwenkuni
 mu,
 Sinhononeya naanaanoru,
 Mukhalihe miroromelo sanyu mwa itthu
 Sihinimala,
 Iyo khasinrowa ovira!
 Nvarelele ntata na Muluku nihinrukunuwa!
 Nvarelele ntata na Muluku nihinrukunuwa!
 Mukhalihe miroromelo sanyu mwa itthu
 Sihinimala,
 Nvarelele ntata na Muluku nihinrukunuwa!

Nuuramaka miru sahu, vakhala wira khamunatoko okuxa
 ntata Nawe, khamuntthuna orwa wira naanaano va?

Nvarelele ntata na Muluku nihinrukunuwa!
 Mukhalihe miroromelo sanyu mwa itthu
 Sihinimala,
 Nvarelele ntata na Muluku nihinrukunuwa!

¹⁴⁴ Mwaaruusi, nyuwo mwa mwanamwane ooreera vano. Maihi anyu makhaani t'oreera, malaku anyu t'arosa. Masi, moosuwela, onrowa okhala meelo paahi, mpakha, awo anrowa onyaala. Ninsuwela sayi wira esumana enoorwa axiitthu kharrowa okhala ekhuuraka, mutthayani, malaku awo, ooreera, makhaani?

¹⁴⁵ Mwamunna, nyuwo mwa a ikuru, muulupale, mitika sa ikuru; muhaana sootthuna suulupale. Masi okathi vakhani, meelo paahi, maihi awo ooreera, oonyokotowa anoomoramora, awo anihala anoottweelela. Makhata awo, maalupale oowookowa anookhurupuwa, vano axiitthu anoorowa okhuura miyoono ni ethayi. Munookuxiwa muroihiwe, mutthayani.

Tivo, mukhalihe miroromelo sanyu mwa itthu
Sihinimala,
Iyo khasinrowa ovira!
Nvarelele ntata na Muluku nihinrukunuwa!
Nvarelele na Muluku. . .

Kinthuna mookole moonoo nvare ntata Nawe vano.

Mukhalihe miroromelo sanyu mwa itthu
Sihinimala,
Nvarelele ntata na Muluku nihinrukunuwa!
Vano mukwaha ola wamala, (Enookhala,
nihiku nlo.)
Vakhala wira mwaahiroromeleya wa Muluku,
Nipuro nooreera ni noowaarya Moovuwani,
Munep'anyu wookuxiwa onimoona!
Xeeni ohivarelaka ntata na Muluku
nihinrukunuwa!
Nvarelele ntata na Muluku nihinrukunuwa!
Mukhalihe miroromelo sanyu mwa itthu
Sihinimala,
Nvarelele ntata na Muluku nihinrukunuwa!

¹⁴⁶ Itthu sinci-ene koonaly'aka, iyaakha soophiyaka miloko miraru ottuli wa pulpitu. Kihooona itthu sookhupanyerya; Kihooona itthu sa ntiittimiho. Yookhumelela yootepa oxankiha kitonko aka woona kookhalaru. . .Owoona anamwane anookhwa etala muramphani; koowoona aximai avekaka nipattuuxa n'ephawu. Etthu yookhupanyereyaxa kitonko aka woona, omoona mulopwana, mutthu, yaatthuneya okhala mwaana a Muluku, akhwaaka ahimusuwenle Muluku.

¹⁴⁷ Kinnimuupuwela muthiyana mmosa eemenle vamukhora ohiyu umosa, wa ekerej'ela, aakithey. Vano khwira, "Nkaakhanle ohiya enyompe aka okhalana enamuna ya etiini ale arin'aya!" Vohivira ewoora emosa, kaahiihaniwa oxipiritaali. Muthiyana ooreera, oophiyaka iyaakha miloko miili ni piili wunnuwa wawe, aamukhuwela, "Mmurowele mulaleyi ule!" Owo aari muKatolika, mwa waamini.

Okathi waattamenly'aka, nuunu awe khwira, "Khamureere opisa, Munna Branham. Soovira minuutu mithanu vakhwiy'awe."

Miyo khwira, "Kinoowerya omoona?"

Khwira, “Owo aamukhuwela mwaha wa nyuwo, moolumo awe ookiserya, ‘Mmurowele mulaleyi ule, Munna Branham!’”

Aiy’awe yaari vaavo, ekhuwelaka, “Nvahererye nivekelo nimosa wa yoowo! Nvahererye nivekelo nimosa!”

Miyo khwira, “Khivareere oxa vano.”

¹⁴⁸ Miyo khupurulela mukhumi vathi. Owo aarina maitho maalupale ookhwila. Muthiyana ooreera; ilepela sikhaani wiitho wawe; maihi ookhwila; ookuxa murima saana. Owo khaareere ohaawa mpakha ilepela okhala wiitho wawe ntoko ithuku. Maitho awe yaahikhuma mmwiitheni mwaya, siiso. Nto, vekeekhai, marupo awe ni isyo saahiphwanya ephiro, yeeyo eri mu—mu. . . Atthu othene anniira yeeyo okathi ankhwaaya, anciene aya. Nto owo aari vale, aataleliweene mwa mukhalelo yoowo, eyano awe yootthukuwa. Ni iyaaphi sawe va, yaahikhuneeliwa epantte nuusu yookhwila ya niitho nawe. Nkinkhalakhala kiliyalaka. Esipo ele khurwa mmuruni mwaka.

Muhinlele mihakhu s’ethiru sa molumwenkuni mu. (Oreera, evuwelo.)

¹⁴⁹ Kaahikhala vakhiviru va mulopwana mmosa wenna nno oPort Fulton, aakhwa. Miyo khwiihaniwa waattamela voolilini vawe. Nto miyo kaahivekela ni yoowo valtaari va ohiyu umosa. Owo aamupwehenrye moonno awe muthiyana mmosa. Miyo khwira, “Mukumihe moonno anyu mumpatikhaly’anyu muhan’owo.”

Owo khwira, “Kinimweettiherya wa Muluku.”

¹⁵⁰ Miyo khwira, “Kahi ni moonno anyu omupatikhaleene.” Miyo nkinaamini etthu ntoko eyo. Owo khukinanareela. Owo khukhuma onanariweene vamukhora.

Miyo kimurowela, okathi vakhani ohoolo waya, okathi waakhw’awe. Owo khukiweha wiitho, khwira, “Muhikivekelele, Munna Bill. Koopweteya. Koomalamala.” Khwira, “Sothene kitonko aka ophwanya, soopweteya.”

¹⁵¹ Miyo kaaphwanyaneya nno vanlothoni, woohirakamela va, nihiku nimosa, wa mulopwana mmosa aakiihanenle waattamela voolilini vawe okathi waakhw’awe. Owo khwira, “Miyo kweekwe kaatthuna *elexe ni elexe*, ni *elexe*.” Owo khwira, “Masi nkinatokoko waarumeela Apwiya. Imaara sinci-ene nkaatthunne orowa waltaari.” Owo khwira, “Munna Branham, nvekele wira Muluku amutthuniherye mwan’aka mwaamuthiyana alokiherye itthu kiiraly’aka. Khino owo onoowiirela etthu Apwiya.”

¹⁵² Miyo khwira, “Khivanweryaneya wiiriwa eyo, munna. Itthu mwaarin’anyu wira soopweteya.” Hum!

¹⁵³ Kaahikhala vakhiviru ni mulopwana mmosa, omoona awananaka axetwani iwoora miloko miili ni xexe. Khwira wira axetwani yaarimweemela waattamela olili awe n’ikwirinti

muxikoni mwaya. Khunaira, “Muhaahiye ekivaraka!” Anyakulaka; yaaninvarelela voolilini. Khunaira, “Ole ori vale. Khamunwerya woona? Onookirweela.” Owo aaroomuhiya Muluku, okathi munci-enexa. Aahikhalana matatha maalupale oosareya munyepu, oosareya etriku, ikhavalalo soothyawa sooreera. Eyaakha emosa eyo ehinatthi, owo aahimutakhaliha Muluku ohoolo Wawe, khwaamana amwaar’awe mwaha w’orowa otapernakulu. Moosuwela yaakhumelenle? Overunya khuhonona ntatha nawe, khwiiva ikhavalalo sawe, khupaha munyepu awe. Nto mulopwan’owo okhwiye mwa enamuna emosa y’elakalaka, awananaka axetwani wira ekhume vasulu wawe.

¹⁵⁴ Nto mpatthani aka mmosa a khalayi (ovuwa!) eemenle iwe, aarophiya w’emaleloni w’ephiro. Miyo khwira, “Munoorowa, paapa?”

Khwira, “Ti yeeyo, Billy.”

Miyo khwira, “Eri sayi?”

¹⁵⁵ Owo khwira, “Sothene sooreera.” Khwira, “Mwaaruuhe an’aka yaattamele olili.” Owo khuhela matat’awe oottettheya vasulu va khula mmosa w’an’awe khwaareeriha. Khwaahimeerya an’awe aili, khwira, “Nvarele matat’aka, nvenxerye osulu, ntoko Yoxuwa ni Kalebi siiraly’aya.” Naaniikoha etthu aarowaawe ohimya. Owo khwira:

Nihiku n’otthapa, nihiku n’otthapa,
Okhuma Yesu orapihaly’awe itampi saka!
Owo ookixuttiha moota wo owehaweha
n’ulompa,
Ni okhala kitthapaka khula nihiku.

Nookhalana kamosa-kamosa wa itthu iyo wira nikumanane, apatthani! Khaavo ohinthuna olya yoolya yooreera, weettiha ekaaro yooreera, okhalana yooreerexa nikhanly’ahu okhalanaka. Miyo nkinimuhimyana mulattu. Ti yooreera. Muluku ontthuna wira mukhalaneke seiyo, masi:

Muhinlele mihakhu s’ethiru sa molumwenuni
mu,
Sinhononeya naanaanoru,
Mukhalihe miroromelo sanyu mwa itthu
Sihinimala,
Iyo khasinrowa ovira!

Nrowe nivenxe matata vano okathi oniip’ahu.

Nvarelele ntata na Muluku nihinrukunuwa!
Nvarelele ntata na Muluku nihinrukunuwa!
Mukhalihe miroromelo sanyu mwa itthu
Sihinimala,
Nvarelele ntata na Muluku nihinrukunuwa!

¹⁵⁶ Nivenyaka, nrowe nirukunuwe nivahane matata ni mutthu vano. Ninoorowa otthikela, muteko, okathi vakhani paahi. Masi kintthuna murukunuwe okathi oniip'ahu eversu ekina y'esipo yeeyo.

Nvarelele ntata na Muluku nihinrukunuwa!

Mwiire, tiithi! Mwiire, paapa! Wa Muluku! Mwiire, mmiravo! Mwiire, munna! Mwiire, munna!

Mukhalihe miroromelo sanyu mwa itthu
Sihinimala,
Nvarelele ntata na Muluku nihinrukunuwa!

¹⁵⁷ Khamutteeliwe murima mwaha wa Yoowo? Mwiire "Amen!" [Muthukumano oniira, "Amen!"—Mol.] Othene animphenta Yoowo, yiire, "Attottopeliwe Apwiya." ["Attottopeliwe Apwiya!"] Othene munaamini wira munoorowa Muttetth'ole wa ipantte xexe. (Mulipelele, okathi vakhani paahi, n'esipo anyu.)

Miyo kinrowa Muttetth'ole wooreera, (Ori sayi vano?)
Apwiya yaatthokiheny'aya ale Awaya;
Weiwo othene ale avuluxiwe a okathi wothene Aniip'aya "Ovuwa!" erukurenrye Ehice Yootteela;
Imaara sikina onnikinkhela Wirimu,
Ni ovuwa onrowaaka woonaxaxa iwe:
Ohakalala xeeni onrowa okhala, kmoonaru Moopoli aka,
Muttetth'ole wooreera wa eweero.

Nyuwo khenosivelani yeeyo?

Kinrowa Muttetth'ole wooreera,
Apwiya aka yaatthokiheny'aya ale Awaya;
Weiwo othene ale avuluxiwe a okathi wothene Anrowaaya wiipa "Ovuwa" erukurenrye Ehice Yootteela;
Oh, imaara sikina onnikinkhela Wirimu,
Ni ohakalala onrowaaka woonaxaxa iwe:
Ohakalala xeeni onrowa okhala, kmoonaru Moopoli aka,
Muttetth'ole wooreera wa eweero.

Munnimphenta Yoowo? [Muthukumano oniira, "Amen."—Mol.] Vano:

Mukuxe Nsina na Yesu ni nyuwo,
Anamwane a mixankiho ni ooriipiwa murima;
Nlo nnimoovahani otthapa ni olipa,
Mukuxe Nenlo mapuro othene munrow'anyu.

Nsina nooreerexa, (Nsina nooreerexa!) O
noosivela! (O noosivela!)

Nrromelo wa vathi ni ohakalala wa Wirimu;

Nsina nooreerexa, (Nsina nooreerexa!) O
noosivela!

Nrromelo wa vathi ni ohakalala wa Wirimu.

Vano, muhiliyale Ettiminku enrwa voosiisu, ewoora ya neethanu na xexe ni minuutu miloko miraru. Vano nto ninoophavela, Apwiya yatthuna vale, omaliha m'okathi, wira nikhhalane waavekelela aretta, Ettiminku enrwa voosiisu ewoora yaneethanu na xexe ni minuutu miloko miraru.

Nsina na Yesu nuurameliwe,
Akokhoreliwaka munawoni mw'Awe,
Mwene a mamwene Wirimu ninoomuwaariha
nleha,

Okathi ekwah'ahu eniphiy'aya okhomoni.

Nsina nooreerexa, (Nsina nooreerexa!) O
noosivela! (O noosivela!)

Nrromelo wa vathi ni ohakalala wa Wirimu;

Nsina nooreerexa, (Nsina nooreerexa!) O
noosivela!

Nrromelo wa vathi ni ohakalala wa Wirimu.

Nwiriyane paahi eversu ila:

Nsina na Yesu nuurameliwe,
Ntoko Mwaakiheryo wa khula murakho;
Soottehatteha soorukureryani,
Muromole Nsina nenno Noowaarya ni
mavekelo. (Ninoorowa wira yeeyo!)

Nsina nooreerexa, (Nsina nooreerexa!) O
noosivela! (O noosivela!)

Nrromelo wa vathi ni ohakalala wa Wirimu;

Nsina nooreerexa, (Nsina nooreerexa) O
noosivela!

Nrromelo wa vathi ni ohakalala wa Wirimu.

Vano kinvahererya muteko wa pastore, Munna Neville, wira ahimye moolumo awe oomaliherya ni etthu p'itthu onrowaawe ohimya.



SOOTHUNEYA THANU NA MOSA SA KAPIRIYELI
OMUTHOTOLA DANIELI EMK61-0730E

(The Sixfold Purpose Of Gabriel's Visit To Daniel)

ETTHARANELO YA ISUMANA MILOKO MITHANU NA MIILI SA DANIELI

Mutthak'ola wa Munna William Marrion Branham, opaceryawene olaleeriwe ni Enkelesi Ettiminku ohiyu, mahiku yeettaka 30 mweeri wa Julho, 1961, oBranham Tabernacle oJeffersonville, Indiana, wAmerika, okuxiwe wo okaravariwa mufitani ya makineti khulempwa wothene ni nntaava n'Enkelesi. Otaphuleliwa nno mw'Emakhuwani okhumiheriwe ni okaiwe ni Voice Of God Recordings.

EMAKHUWA

©2023 VGR, ALL RIGHTS RESERVED

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org

Olopolo mwaha wa ihaakhi sa mwaneene

Ihaakhi sothene sinnaakiheriwa. Eliivuru ila pooti otthittiwa owaani wira mutthu arumeele wala okaiwa, voohilinwa etthu, ntoko ekaruma y'olaleerya Ehapari yooreera ya Yesu Kristu. Eliivuru ila ehitemihiweke, otthittiwa eyaattelo yuulupale, oheliwa muwepisaiti, oheliwa moothukumanyiwa wira ekuxiwe-tho, otaphuleliwa ni mattaava makina, wala orumeeliwa wira ophwanyiwe musurukhu vahikhanle n'utthuniheriwa woolempwa ni Voice Of God Recordings®.

Mwaaphavelaka wiiwa-tho wala ikaruma sikina sikhanelle, xontte mulavule ni:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org